

兩浙輶軒續錄

兩浙輜軒續錄卷四十三目

吳鳳藻 沈祖諫 方熊祥 張日銜 張敬生

方 馥 張德容 韓光鼎 康允吉 葉爾安

陳 林 高 鼎 陸齊壽 許紹曾 徐鴻釐

周錫鯤 褚維厚 馮柳孫 徐伯壘 徐振熙

馬華鼎 孫 謀 許燕君 錢祖蔭 馬承福

王慶龍 鍾承藻 趙 筠 錢炳熙 嚴晉福

孫錫疇 王 璣 王孝穆 徐 棠 費邦翰

許秉辰 周 觀 傅延年 趙炳璿 馬傳朱

陳家保 傅墨林 陳其彩 陳春暉 夏 疇

何映潢 俞鳳岡 葉鴻政 詹大愚 張應庚

朱鼎元 吳錫熊 張清華 施文銓 何 琳

陶守廉 張本 温汝超 鄒在官 魏丙慶

朱允元 錢觀 余贊 高炳麟 江藍

魏錫曾 吳元禧 陸以鎬 蔣學濟 李善蘭

杜柏 陳炳新 程菊孫 任端良 吳鴻吉

周元會 張金瀾 朱善鳳 朱鼎鎬 朱善寶

夏斗寅 丁彥臣 卞乃詭 吳光鎬 吳光鏐

吳光鈺 王景曾 魏鐘 吳熾昌 孫道乾

周錫桐 倪師旦 任作梅 周鼎臣 周白山

魏蘭汀 李肇桂 管名喬 朱籥 周世滋

胡震源 王汝霖

兩浙翰軒續錄卷四十三

督學使者潘衍桐訂

吳鳳藻

字蓉圃錢塘人咸豐癸丑會元一甲二名進士官禮科給事中

吳兆麟傳畧蓉圃工文善書為趙文恪所激賞選道光己酉拔貢旋以子妻之通籍後先後典福建湖北鄉試

穆宗

親政獻治平十議嘗注邵氏擊壤集輯李氏二曲粹言又輯修吉錄分力學勵品接人應事修身閑家服官居

鄉八門為律己之助政所居之四有堂曰有精神之謂

富有廉恥之謂貴有書卷能讀之謂福有子孫率教之謂壽

陶然亭

塵中那有清涼界絕好江亭兩字題

余篆江亭二字懸諸客座滿地落花

防客損極天綠葦覺城低春秋佳日可能醉湖海多才不易

齊話到百年猶夢寐酒闌車馬已東西

看雲歌

小樓四面春山多弄晴風月何婆婆登樓望遠興無極白雲

忽起青山阿初如輕絲忽如縷或如匹練或溼褚已看蒼翠
失前峯旋見冥濛沈遠渚樓前古木參差平鷗鳴徹煙冥
冥碧桃樹上鶯欲語水晶簾外花微馨鶯語花馨正未已山
中微覺輕風起濛濛雲氣忽吹開朝陽依舊橫山紫君不見
千秋萬歲一滄桑人事升沈亦如此

沈祖諫

字果臺號味香錢塘人咸豐
癸丑進士官翰林院編修

注敦書曰果臺與其兄也魯念農續承
世澤馳譽文苑時人目為沈氏三鳳

闌干二絕句

小雨初晴搭柳絲曉鶯飛亂碧桃枝伴人一霎春無主愁絕
當年石帚詞

畫廊斜處界湘簾花乍開時酒半添十二紅窗今盡敞挂將
月子兩頭纖

方熊祥字芾堂號子望勸旭子仁和人咸豐癸丑進士官福建興化知府

寄丁冲泉同年葆和滬上

知君方出險虎口得餘生王粲登樓感成連入海情家山胡

蜨夢羈旅杜鵑聲何日一尊酒春風到鳳城

貧賤交原少兵戈劫屢經國殤哀薤露謂介帆節知己似晨

星可耐俗眼白漸彫雙鬢青更憐故人艾願代寫零丁謂雨辰殿

撰

張曰銜字秋粟仁和人咸豐癸丑進士官廣東嘉應直隸知州著白城詩鈔

許淮祥曰秋粟先生性穎異且孝年十二即能作擘窠書文病風痺十年侍湯藥罔懈通籍後仕粵東歷充同考官宰香山民強弱爭沙田悉與經界民乃安國課亦升至數百頃嗜吟詠橐未槩

謁宋陸君實先生墓

厓門毅魄凜如神墓草千年慘不春碧水無情沈帝子青山

有福葬忠臣怒濤尙想騎鯨日抔土何疑化鶴身墓有謂是公母骨者

明郭子章論辨之赤坎英靈同悵望敢辭景仰薦芳蘋墓無祭田爲籌祀產並修

資之

楊太后陵

史稱太后蹈海死張世傑葬之海濱不言其處饒平縣志云陵在南澳志因之并云果老

峯遺址尙存蓋傳疑也

舳艫震蕩波翻紅北軍矢石環相攻君臣誓死不再辱駢肩

願葬蛟龍宮慈元草草開黃屋懷抱猶存趙家肉蒼茫天水

綫難延開關枉對銀濤哭不堪降表再簽名在水雲詩降表簽名謝道清指

謝太后也母子拌隨海上鯨金盃玉魚何處覓埋來窮島卽佳城

厓山回首風騷屑軼事流傳青簡缺至今疑冢亦荒蕪寒食

空嘯杜鵑血

辭郎洲

宋統制張達赴少帝之難其妻陳璧娘送別于此故名

南來白雁悲風催連天波浪轟成雷將軍仗劍赴國難紅顏
在室頭不回山河只賸扁舟地此去明知命如寄遠送聊申
伉儷情捨身自盡君臣義辭郎從此鷓翼單望夫石畔愁雲
漫願郎大節炳青史孤棲不惜閨門寒洲上年年春草綠濤
聲猶似臨歧哭趙家鐘簾久煙銷留得女貞光海曲

大林剿賊歌

縣南海島如雲矗

大林在縣南海中

白浪奔騰繞層麓窮黎開墾得

鳩居遁逃漸有妣徒蓄綠林何處來梟雄蟻附蜂屯聚成毒

舩艦宵馳估客驚橐囊晝劫村氓哭遠攻壁壘縱火燔近擄

旄倪待金贖錯壤災雖三邑同

新會新安

當衝禍實一方獨

舟師奉令強合圍豕突狼奔孰追逐軍中高克且翺翔海上

孫恩肯潛伏我來守土屬海疆軫念時艱爲蒿日轉餉先愁

杼柚空談兵敢信韜鈴熟欲爲吾民解倒懸忍負牛羊作司
牧請之大府誓滅此要掣鯨鯢彰顯戮轟天礮石排舂艘破
日旌旂接艫舳官民義勇氣百倍揚颿徑搗賊心腹蝥弧一
舉身先登手縛渠魁出深谷其餘螳臂尙支撐擊以刀才遺
以鏃殺人如草聲不聞但見頭顱血淋漓好生詎不體

皇仁聚而殲旃毋乃酷回首生靈荼毒時一死蔽辜猶不足
茅檐父老策杖來稽首河濱淚簌簌爲言水火已頻年衽席
今蒙使君福我慚教化未周浹枉使愚蒙遭僇辱自茲害馬
盡驅除閭里依然守耕讀清源正本聖有訓弭盜法先身不
欲長歌豈但報佳篇自勉還爲寮友勸

晨招李陶村吳小亭游青澳山

尋詩招素侶破曉共山行活水隨田注疎花雜草生磴危筇

有力香冷廟無名且掃苔階出涼颼拂面輕

南澳雜詩

漁舟多趁海邊風撒網爭投曉霧中日午潮回帆盡轉黃花

賣徧市西東黃花澳中魚名

丞相丹心照海天至今荒島有遺阡村氓也識忠臣好歲歲

清明挂紙錢陸丞相墓在青徑口每歲清明村人多挂紙錢于墓上

扈從惟存海上舟翠華不是奉宸遊香孩王業如煙盡贏得

孤兒有廢樓太子樓是帝昺駐蹕處

張敬生字吉人餘杭人咸豐癸丑進士官戶部員外郎著虎林山館詩存

許維祥曰吉人品學純篤才識開敏官農曹計柑某公器賞之生平耽吟詠嘗選歷代名人詩手鈔成卷尤酷嗜少陵義山

兩家藁未絜

傾蓋亭

我來鄴子城驅車日初午行行復行行道側見殘廡上有傾
蓋亭豐碑立丈五白草連空階老樹倚荒圃程子洵良友廟
貌肅然睹今人重聲華此道棄如土高風邈難追一亭自千
古

題龐仲飶廈門送別圖

圖為送高擲舟太史冊封琉球作

丈夫志萬里當作乘風游跼躄處牖下直與鱗鱗侔偉哉鳳
池客弭節凌滄洲雲輅指邗霸長嘯鞭靈虬龐君更豪士握
手臨洪流把酒踏鼉背醉語驚陽侯咫尺迷仙槎危立馳雙
眸澄波百萬頃但見蒼煙浮平生此壯觀詎足攫離愁俯仰
十年事回首天南頭使星久化去往跡圖中搜令我動遐矚
風雨生堂陬攬圖三太息瑟瑟波濤秋

望都道中題壁

春遊識盡燕南路弔古重來感慨多大野風塵迷督亢長河
冰雪接滹沱從龍脫險開炎運屠狗論交起壯歌莫訝千年
陵谷變西山回首石嵯峨

讀五國故事題後

英雄空說黑雲都十七郎君信懦夫回首海陵三百口可憐
遺恨滿江湖

紅樓幕下人雙醉畫綵亭前花半開一曲金鈴剛入破隔江
齊聽唱檀來

綵樓山半藝沈檀畫舫燒鐙幾度看一去中原春寂寞杜鵑
嘯遍上清壇

此兒骨法果非常四十年來不下堂萬里崎嶇歸命日可曾
步輦結香囊

金殿銀樓日月樓越臺酣宴幾時休劉郎願作降王長自結
珠鞍獻汴州

飲虹入室妖初見上馬簪花孽又逢留得雲州詩思好何如
開國有三龍

短歌行

生不能射虎南山頭立功異域爭封侯又不能垂釣西江上
一領羊裘傲卿相衣冠京雒縑塵多輪蹄頑鐵同消磨懸匏
身世何蹉跎酒酣耳熱興悲歌

今我不樂思豪遊手攜八寶珊瑚鉤讀書萬卷不更事龍門
慎勿輕相投獨行俛俛欲何往逢人但問韓荊州吁嗟乎卜
和懷璞猶遭刖相馬孫陽久絕迹碌碌原非賈傅才安得漢
宮夜半虛前席

長安大姓推金張紫裘年少神飛揚十五善才妙歌舞寶馬
珠鞍趨若狂朝貸千金買雛鳳紅綃暮積纏頭重昇平絃管
任嘈雜不知海內兵塵動嗚呼不知海內兵塵動與君且酌
玻璃甕

人生適意耳問君富貴需何年糟邱之臺築千仞三杯草聖
甘狂顛高歌未已忽大笑拔劍起舞仙乎仙長揖李供奉醉
拍洪崖肩古來賢達竟安在酒人酒人爾獨全其天

晚步

行行山下路松竹自青蒼一鳥破煙去四峰明夕陽

題吳筠軒觀察

兆麟

看山圖卽送之任江西

君不見伯生畫與詩相參遠山一髮思江南又不見頭白君
家老祭酒馬上青山呼負負十丈輭紅蔽孔道笠屐闌情復

何有簪毫仙客豔金貂時艱歷盡天懷超忽辭魏闕賦于役
意氣磅礴凌秋霄西去太行在眼底峰巒層疊如相招囊詩
策馬亦奇概一鞭吟望何逍遙遊蹤三載自歷歷披圖猶爲
滌塵囂日昨

詔書下薇省特付名區憑管領豫章江上好山多傑閣嵯峨
攬煙景帝子山靈在何許翠蕤雲旂盪空影監司此行作霖
雨餘事何妨樂游騁鴻泥回首證因緣寄我詩篇定道警我
賦斯圖欲贈君秋花秋月悵離羣五岳恣遊果何日吟腸別
緒徒紛紛春明門外一揮手晚天目極西山雲

寄懷夔海稚循

弱歲弄柔翰志與風雅親三唐與兩宋哆口談津津換骨無
金丹糟粕猶雜陳高吟學蟬噪搖臂稱詩人涉江採芙蓉遇

君越水濱讀君一卷詩揮灑如有神慷慨浣花集身世悲風
塵有時寄高談王韋兩絕倫有時出逋峭韓柳空嶙峋八音
自和會眾妙歸陶甄雒誦啟神悟意象幡然新始信作詩法
性情求其真從來翰墨緣契合非無因吟筒與酒瓊聯袂追
良辰自我游京師千里念癯陸有詩不敢吟吟時感心曲海
世無稽中散古調誰復彈頽流失砥柱薄俗隨狂瀾翩翩佳
公子拔幟爭文壇精神與古會嗜好別鹹酸論文軼秦漢次
第窺蘇韓賦詩刪俗豔屈宋皆衙官愛奇更有癖博綜人所
難東壁富圖書金石紛雕刻末學愧淺陋智力平生殫見聞
域方隅兔冊搜叢殘感君獨見許握手盟金蘭得遊箸作林
厯厯成奇觀執鞭甘御李清晤有餘歡錯刀迭爲贈未報青
琅玕自我遊京師經年違叔度回首大雅堂江天隔雲樹雅

雜懷

被酒登高臺高臺多悲風山川滿蕭瑟城郭何溟濛浮雲蔽
 日月覩此摧心胸腰閒雙鹿盧耿耿流長虹非無祖生志亦
 羨嫖姚功半生事睽越烈士嗟途窮儵然動遐舉天外有冥
 鴻

春花不上枝秋花怨霜早猗猗九畹蘭開遲為誰好美人金
 錯刀投贈非草草蹇脩期不來煩憂令人老松柏有本心平
 生託襟抱與君結古歡盟言幸長保

太史牛馬走奔逐固其分淮南雞犬羣飛昇一何迅淒淒草
 頭露富貴奚足問神仙厥旨微長生杳難信言采西山蕨窮
 餓亦任運老氏戒守雌毋為較尺寸明月照虛潭此理靜相
 印

迷離雙鳳闕中有淩霄臺宮廷煥金碧誅蕩天門開衣冠集
萬國氣象殊崔巍苦念瑤池樂駕言遊蓬萊穆王自神武八
駿何時迴汾陰歌一曲李嶠真仙才書生昧國計獨愴昆明
灰

獨鶴盛毛羽歲寒常苦飢餌以太倉粟弋者未忘機棄此勿
復顧誓向西南飛鳳凰在干仞貴賤難因依竹生有卑枝棲
託毋相違願言謝網羅文采安所希

匈奴自桀虜漢家重和親王嬙好顏色坐使淪風塵我思武
皇業百戰兵如神河西數大郡都護規模新陵谷易變遷憑
弔淚霑巾天時有代謝強弱安足論胡越本一家六合皆王
臣願沽蘭陵酒一醉焉支春

陳陶十萬眾譬彼坑陽平房瑄本無術趙括安知兵夜聞虜

築聲爲譜從軍行少年誰家子聯騎遊重城黃金飾寶劍白
馬輝朱纓從軍亦云樂俠氣時縱橫青青望楊柳何處亞夫
營

折彼嶺頭梅相思渺天末我有同心人尺書未能達飄風一
何厲刁騷振林樾積雪盈庭階枯坐意兀兀江湖戰伐多極
目望遼闊倜儻寄天地胡爲獨愁怛援我湘綺琴中夜浩然
發

感懷八首

功名浪說日邊槎得失茫茫去路賒掩抑心情雞斷尾艱難
身世虎磨牙夢遊誰借邯鄲枕歸隱思尋栗里花檢點衣塵
緇素變廿年奔走負京華

未應高枕慶平康西北櫬槍耿有芒但祝邊庭皆李牧不妨

郎署老馮唐半生尙抱澄清志萬里空陳捍禦方莫訝東人
歌杼柚大農財力困輸將

行藏龜策不須探覆雨翻雲世未諳那有真才空冀北但聞
捷徑在終南盛名誰斥深源謬雄辯同誇景略譚寂寞承明
老詞客太元消息靜中參

慙直從來忤俗情長才應世有權衡交因勢合文章賤官要
金多骨肉輕名士終須依狗監詩人原不諱蠅營守雌似我
盟心久證取冰壺一片清

漫言率舊總無愆政比張琴易改絃故事已裁搜粟尉新書
又上導河篇久勞碧海籌飛輓不信黃流任變遷法制推行
須盡利聰明誰更勝前賢

簞瓢無恙阮囊空欲起昌黎爲送窮宦況逡巡如退鷁遊蹤

汗漫羨冥鴻，肉生髀裏心猶壯。
金盡牀頭氣不雄，敢笑龍門談貨殖。
鴟夷原有濟時功。

屈指朋儕贈答疎，聯歡應憶合簪初。
願求陶侃軍中壁，怕讀鄒陽獄裏書。
一代才名歸琢鍊，五陵豪氣自銷除。
平生風義追前哲，石契蘭交總不如。

欲將廊廟換巖阿，鏡裏華顛感慨多。
世事浮雲同變幻，光陰掣電易蹉跎。
讓人功業棋輸劫，老我情懷井不波。
賴有新詩堪寄興，蒼茫搖筆一高歌。

題錢芝門

恩榮

唐園紀游圖卷

人生閱世如浮漚，逝哉日月雙丸遄。
搏沙聚散了無定，鴻泥回首增煩憂。
江南初春花事早，琴堂有客追前游。
膠城名園夾綠水，寒梅香動環林陬。
朋儕三五盡豪翰，雪中鬪酒飛觥

籌舊是高賢讀書處二百餘載傳風流撫今感昔足憑弔新
篇絡繹交相酬蘭亭不數王逸少西園復見蘇子由錢君詩
名歷大厯豪情倜儻神仙儔風花過眼惜良會好景一一圖
中收揭來京雒羈棲久黃墟握手何綢繆出圖示我見深意
煩襟一洗開吟眸我家近在孤山麓逋仙故宅林泉幽繞嶺
梅花三百樹樹樹老榦蟠蒼蚪空山鶴化攬遺蹟高朋勝賞
時句留一官迫我長安道三年落拓嗟貂裘生平墜歡杳難
續夢魂不到天南頭綺牕花發動遐想舊盟孤負雙閒鷗鳴
呼錢君且作達醉鄉無處無糟邱卽今東望尙戎馬風塵頽
洞連江郵蟲沙浩劫不可問何如斗酒能消愁金臺絲竹助
慷慨畫筵日弄珊瑚鉤手贈梅枝結古誼幾生詩骨同清修
眼前離合勿悵悵與君努力期千秋

方 駮 字鏡湖 西安人 咸豐癸丑進士 官工部郎中

西安懷舊錄 鏡湖生平淵穆有識篤厚親舊道光癸卯中解元年甫十九好游山水文日益粹閱十年咸進士授主事遷工部營繕司郎中 記名御史在都二十餘年

送舫湖弟 出都

干戈滿地驚相見 風雨中宵送子行 苦憶逍遙詩句好 未應

惆悵話來生

張德容 字松坪 一字少薇 西安人 咸豐癸丑進士 官湖南岳州知府 著二銘草堂遺稿

西安懷舊錄 岳州知府 著二銘草堂遺稿 石出守安陸 荆州岳州公餘之暇輒搜羅六朝以上及周秦文字 成金石聚十六卷 海東金石苑二卷 皆自鈎勒 攷訂 精核 嘗欲鈎勒唐宋及南詔大理諸碑 各為一集 惜未成 書晚年以母老乞養 歸宦 橐蕭然 如初仕時

緝雅堂詩話 松坪太守酷好碑版 精於鑒別 所著金石聚一書 於輿地職方 附存攷核 訓詁 小學 藉資援證 其書指在存真 不列覆本 每卷碑目之下 前人著錄 悉載其名 涉覽該洽 便人探討 石存何地 以及出土年代 何

人訪得記載詳審按策可稽辨何亟畫象朱博殘石上
庸長之類為真蹟庶孝禹陽嘉殘碑及楊鬻買地嘉禾
九穗之類為偽造具有塙見各碑跋語自據心得無反
於古而亦不欲疆同其精粹語蘇齋燕庭復起亦當首
肯嘗以所得拓本分次為一編南詔大理西夏朝鮮為
至隋為一編唐至五代為一編南詔大理西夏朝鮮為
一編初編甫就遽委物化睹此已刊善本益愜想其未
刊者域外拓本僅傳諸城劉方伯海東金石志為已成
之書君彙南詔大理西夏朝鮮諸刻幅
頓愈擴蒐輯益周未及刊行尤可惜已

丙辰之冬偕吳蓉圃 鳳藻 朱修伯 學勤 呂九霞 朝瑞 黃
緗芸 雲鶴 黃孝侯 鈺 薛淮生 春黎 張吉人 敬生 曹心

一 貽成 諸同人作消寒雅集漫成四律 錄二

幾人織翠耀華裾我亦纔辭舊草廬適意欣從同譜後知心
不改締交初及時要識隨緣好投筆非關擇術疏酌酒賦詩
能假日謂余不飲待何如

何時江表靖烽煙空有豪懷到酒邊鶴瘦風威支夜月雁寒

霜影度長天杜陵從事吟諸將阮籍知音冠七賢多道長安
行樂地問誰先著祖生鞭

韓光鼎 字俊伯錢唐諸生官山東

姚士隆曰俊伯攝平原時齊河土寇郭少棠擁眾叛設
計禽之沂水監生王步雲結髮捻脅諸城相國裔以令
眾發有日矣亟率役入其巢掩得之誅步雲而事定東
阿盜殺事主五人獲五盜具獄上部駁傷多不能無幫
凶君奉檄獄是獄旁皇竟夕躍起曰得之矣是必盜何
于門外一人出羣毆之再出再毆之死者不同時正凶
皆幫凶也一訊而服先後
結案逾萬數所至有聲

迎湖曲 并序

戊午七月暇日與邵位西表兄 懿辰 自西興渡江夜

半潮來澎湃奔騰孤舟幾覆迄今二十六年痛定回

里猶有餘悸位西于辛酉冬殉難余潦倒一官今亦

老矣振觸前塵慨然有作

錢江七月平如掌我與邵君同打槳疎星無月吐微茫漁火
有光認三兩擊楫欲渡江中流忽聞天外風颺颺榜人相顧
色然駭疑是弄珠神女游壯游眞被靈霄妬一綫銀蛇蜿蜒
赴到耳初驚萬壑松回頭望斷西興樹此時帆柁兩無權梗
泛蓬飄且聽天敢謂涉川仗忠信一身聊與水周旋有時舟
如天上坐破浪乘風等箕簸有時舟向水底潛衣裳腥染蛟
龍涎有時挾舟婆娑舞飄然一葉吞還吐夜半眞來十萬軍
濤頭誰捍三千弩檣鐙欲滅光忽明舟子大呼吾更生銀山
萬疊杳然去賸有如練波澄清我聞潮汐來有期常與明月
爲盈虧至信今猶不可憑世閒萬事誰能知吁嗟乎邵子不
久騎箕去萇宏碧血埋何處當時若逐楊侯游安得大節昭
然著至今回首望西巖思痛懷人淚滿衫我尙浮沈隨宦海

不知何日得收帆

康允吉

字子蘭仁
和歲貢

題吳乙杉虞美人花畫幅

八千子弟化沙蟲贏得香魂一縷紅太息兵戈猶未息空攜

豔筆對春風

時金陵
戒嚴

葉爾安

字貞甫仁和廩貢官
河南許州直隸知州

家傳略貞甫才識開敏有幹局任大梁歷宰劇邑所至
有政聲牧許州以隨撫部出閱伍車覆傷脛乞假歸卒
於家年僅四十有四嘗奉檄催征至丙黃則諸縣皆苦
旱守令逡巡不敢請振貞甫毅然草牘上語甚迫切遂
發振卽以貞甫董其事振畢而疾大作將不起有邑老
陶廷元者造門請曰葉侯不忍死吾民天豈忍於此時
此地死葉侯哉我請治之藥進而病若失勝宮保督師
秦中聞其才欲羅致幕下檄凡七至堅辭不就未幾勝
果敗其明決又如此

平皋道中與徐潤生話別

相別已八載相聚纔五旬一聚難爲別交到中年真離合不
自主迹幻心愈親君奮天邊翼我困池中鱗際會雖有異志
趣期共敦縱談露胸臆富貴如浮雲何以愜素懷曰歸同欣
欣送君大河北埃君明湖濱毋羨鸞鶴舉而忘鷗鷺盟

過高村橋

輪鐵消磨氣不豪淇園祇覺竹蕭騷橋危誰補三生石水急
如聞八月濤味透宦情知嚼蠟撇開詩料窘題糕一竿若許
閒垂釣舟楫無才世外逃

書胡萼亭殉狀後

死忠不負君死孝不辱親合乎義則死忠孝乃至純在昔咸
豐歲甲寅黔中八寨寇警頻萼亭先生爲幕賓慷慨乞師甦
此民苦籌戰守逾十旬煙昏月黑孤城淪先生有母難許身

但冀匿迹避惡氛賊來搜索偏紛紛被執不屈目怒瞋欲死
未死中逡巡所慮白髮多悲辛乘閒得脫奔都勻追騎交馳
又引軍可憐中道阻荆榛心灰寸草辭三春從容絕粒戾還
迤北風淒矣生愁雲襟上之血壁上文三十二字常鮮新先
生雖死猶如存吁嗟乎武城去師道尊睢陽殉臣節敦吾謂
臨難不論師與臣死生視義爲歸循君不見生輕一羽死重
千鈞如先生者見危授命今成人

陳

林字韻蕃仁
和諸生

和家大人富春歸權元韻

一路長橋復短橋木蘭舟逐浪花搖半江湖落風初定數葉
帆收雨正瀟野竹翠叢煙靄合山櫻紅綻火雲燒昇平門外
天連水遙指垂虹霽後銷

弱柳絲絲翠遠津
鯉魚風過浪翻銀
烏篷高揭潮前渡
紅雨微沾醉後巾
野寺鐘聲催破曉
江城漁唱亂殘春
飽看山色桐君好
海國恩霑俾俾民

高

鼎字象一仁和人
箬拙吾詩稿

聞笛

何處老龍吟蒼茫
夜色侵斷雲飛塞
迴殘月入樓深
敲枕懷人夢橫戈
征戍心無端聞此
曲清淚欲沾襟

陸齊壽

原名振之字湖山海甯
歲貢著最樂山莊詩鈔

應時良序略湖山童時即著論數萬言驚長老既為諸
生專力于詩嗣響射山抗衡少白家學宗風藉以弗墜
管廷芬曰湖山著漢易圖說拾義人服其精博上詩善
書兼長蘭竹家瓊鵬湖許梅圃品為山莊十景湖山賦
詩徵和蓋深得林泉之趣者

正月五日泛舟至硤川寄友

惻惻輕寒上小船風光淡寫蚤春天梅花已放全如笑山色
難蘇尙欲眠小市杯觴延故客畫樓簫鼓入新年此行不減

斜川樂七字吟成寄短箋

陶公於是日遊斜川後東坡續遊亦在是日

許忠義公手植銀杏樹歌

樹在吾邑洛塘公廟前俗呼故廟卽公讀書林舊址

沈香亭北紅藥開歡宴未罷擊鼓催倉皇翠輦馬嵬道佛堂
梨樹真堪哀睢陽本是彈丸地保障江淮亦重寄煌煌太守
日月光身後傳疑豈足議讀書林爲公故園千年手澤何蜷
蜿偃師歸葬事莫必撫摩髣髴來精魂崛強身疑厲鬼立攬
拳勢作黑衣奔夜來風雨聲忽變錚鏦金鐵相酣戰魯公握
拳氣未平南八斷指心猶怨乃知大樹雖飄零神之所憑終
眷戀森嚴廟貌重禱祈勿翦勿伐留人思何如丞相祠前柏
亦有棲霞嶺上梅

閻典史歌

降旛又見石頭臺內殿春燈停豔曲沿江烽火照連營半壁
河山同破竹江陰蕞爾一彈丸八十一日心力殫矢匹援絕
不少顧誰歟守者典史官典史之官末秩耳奮然投袂起邑
里立志不名二姓臣出身拌爲孤城死大呼慟哭籲高皇風
雲慘淡天無光撤屋發材資保障煮弓熏鼠作餽糧忠義感
人人致果一日百戰瘡重裹縛芻取箭霧竿燈縋卒斫營風
縱火團團月出挂城頭給錢攜酒賞中秋鼓角悲哀催痛飲
簫笳淒楚動清謳百道梯衝攻愈急殘兵疲敝吞聲泣登陴
已見敵樓崩扼巷難遮鐵騎入揮刃猶然跳盪頻力盡就擒
怒目瞑隕首甘爲李遠鬼駢屍盡是田橫民嗚呼君不見分
茅胙土奇男子反面前驅不知恥某本明朝一典史公等何

以遂至此

題國山捫碑圖為張石匏開福作

樓船將軍天上來，鐵鎖沈江城門開。東吳君臣但兒戲，黃旗

紫蓋安在哉。侈陳符瑞有片石，至今剝落荒山隈。好奇嗜古

張公子，客游遊返秦淮水。翩然乘興行相尋，山高去天尺有

咫。葛藤十里皆刺膚，磴道千盤不容趾。獨立空巖歎寂寥，穹

碑驚覩何堯堯。虺走蛇奔勢詰屈，鸞翔鳳翥形飄飄。撫摩三

復躬，椎搨私心勝獲瓊。與瑤攜歸傳示誇，人說此游不枉真

快絕。讀辭直欲追魏壇，摹石行將媵周碣。尊甫芑堂徵君曾至太學躬摹石鼓

文以歸刻石立亭中名石鼓亭龍邱居士寫作圖，癡情如見冥搜切。圖為陳南水筆

嗚呼秦皇昔在封禪年，萬乘雷動嶧山巔。臣斯臣綰頌功德

用愚黔首深雕鏤，長繩拽倒野火燒。此中興廢無乃天天璽

遺墨字如斗落葉蕭蕭人尙走霸圖空唱秣陵秋如畫江山
復誰有古今成局總徒然大笑一紙碑在手

懷人詩十四首

錄四

豪氣還聞小九州一聲長嘯海天秋詩詞駭俗翻新樣談笑
凌人踞上游布襪青鞵原洒落烏絲紅袖儘風流寒窗同翦

更闌燭記否當年細校讐

徐蝶莊人杰

豪情逸概孰知音總角論交直至今曼倩恢諧猶執戟戴生
激烈欲搥琴齋鹽莫問家中事風雪遙思馬上吟多恐蹉跎

成老大回頭歲月已駸駸

陳鹿賓慶莘

世界華嚴彈指過掉頭小隱復云何市中賣米周青士江上
乘舟張志和名意不妨都淡泊壯懷從此又消磨一肩行色

秋山外擁鼻知君句自哦

楊霞海銛

孤燈照影已多年忽為飢驅漫著鞭時將游山東白髮倚閭還有

母青郊種秫并無田久依門戶原非計浪走天涯又自憐檢

點行裝蕭索甚家風自昔祇寒氊家鷺亭宗鑄

許紹曾字承哉海甯廩生著錄齋遺稿

金谿雜詠

一代江山霸主才經過浩劫幾飛灰越王遺址何人問落日

寒雅較獵臺

塘號仙人結塞長山中魑魅太倡狂英雄紅粉歸黃土記取

當時吳賽娘

神工開鑿自何年得訪奇蹤亦宿緣游徧洞天三十六玉華

端合駐神仙

屋連鍾翠樹森森地接含雲路舊經若使金谿容小隱重邀

漁弟結茅亭

徐鴻釐

字冰倩號嘯秋海甯諸生著洛溪草堂詩草

秋日遊鷺峰訪古鷺臺敎寺復從山後小徑出望越西

諸山而歸得詩三首

名山如高人欲接不容易尋幽類行文徑直便寡味言瞻靈
鷺峰岌業動遐睇薄陰戀崇岡遙林媚新霽心逐飛鳥翔路
轉修蛇細潺湲橫一溪蒙密滄眾翳撥雲更深探坐石偶小
憩清耳盈飛泉爽肌但空翠忽若鸞鳳鳴層巒落松吹
振策重孤行登頓肯辭憊逕斷林愈深峯迴路尤隘攀磔循
山椒崢嶸獲香界萬竹圍寺門精藍儼圖畫煌煌石軍書通
靈去霞外徒使贖本留徘徊發深喟晉梅亦云枯骨早老龍
蛻惟餘曼陀羅虬枝壓松檜花雨遲續紛古香猶馥馥初地

緬支公此焉衲衣掛卓錫停聞雲開山演宗派寂寂青豆房
清談破禪械雪壁淨無塵有詩不敢疥

清景愜勝情茗坐興未足疏鐘蕩微煙倦鳥落叢薄暝色催
歸心欲留媿塵俗力循迴磴旋決舍故塗熟回頭已蒼茫卻
步入紆曲窅爾深箒披豁若眾峯壘金碧烘頰陽紫翠滿遙
麓陡覺詩情催絕勝畫臺讀安得謝世網幽居一椽卜虛願
徒茫茫塵心終落落歸來極淒涼秋風掩茆屋夜燈眇無眠
吟魂墮空綠

羅庵

曲逕層陰合空山古刹留禪心黃葉冷詩夢綠蘿幽一磬欲
催暮羣峰相對秋商瞿渺高躅吟卷待重搜

商拜亭明經嘉言寓此最久時

適讀明經詩集

擬秋興八首用杜韻

西風蕭槭戰寒林，獨掩茅堂氣鬱森。
滿目雲山非故土，極天烽火壓重陰。
箸書敢作千秋想，磨劍虛懷十載心。
最是悽迷今夜月，亂峰如夢動霜砧。

灑灑滄溟日影斜，曾瞻銅柱認中華。
掀波竟脫支祁鎖，貫月遙通博望槎。
渺渺龍河浮漢幟，迢迢雞塞冷胡笳。
防邊籌海今誰是，坐使天吳蹴浪花。

回首鄉關藹暮暉，隔江旌旆見依微。
紅羊一劫桑田變，青犢羣驅海水飛。
大澤萑苻風轉競，小園齋菜願多違。
河山寸尺天荒地，秦越誰還視瘠肥。

珍重楸枰誤後棋，支撐殘局亦堪悲。
正當讀祝興師日，空憶臨流擊楫時。
五丈風雲虛想像，八公草木慣驚馳。
頻年辛苦

專征將好把韜鈴子細思

離宮突兀傍西山舊事驚心一炬閒
草草青騾催法駕攘攘蒼兕逼嚴關
摩來銅狄徒揮淚議到金縉且破顏
卻憶圖陳王會日梯航齊覲紫宸班

赤彗亾寒怯舉頭荒涼寰宇共驚秋
四維鼇極曾開域一曲龜茲未解愁
無復金隄防穴蟻那容碧海侶沙鷗
區分幅裂尋常事不見燕雲十六州

霸圖越紐記豐功蒼莽山川感慨中
名士衣冠江左日清遊觴詠永和風
移營偏諱全軍墨沈鎖幾忘列炬紅
稍喜鑑湖無恙在一舟空翠對溪翁

如响流光付漚迤殘荷衰柳滿荒陂
鄉書遠盼南鴻驛客路寒驚越鳥枝
捲地金焮聲益厲搖天玉弩燄仍移
酒闌何限

新亭感傷亂吟成一淚垂

周錫鯤

字文江海甯譜生箸草窗吟稿

曉步紫薇上方遇霧

蚤起為登山開門見殘月
摳衣仄徑通霜花點行屐
俄焉密霧生峯巒
一一繞礪樹交加
風搖雨滴瀝
同行入忽後
回頭失咫尺
下望千人家
都作白雲白
宿鳥想離巢
前林飛拍拍
山犬吠何處
隱隱竹籬隔
生長三十年
飢驅事行役
好景在目前
流光同一擲
今歲偶假館
僻處西山僻
破曉一筇攜
踏破莓苔跡
天公展畫圖
生面居然闢
此境人未知
此意我獨適
塔影漏東峰
杲杲日將出
仰看山頂僧
先我立巖石

褚維厚

字子方號劬齋餘杭廩貢官直隸邢台知縣

譚廷獻序略劬齋世丈以北溟先生為父爽齋子親兩先生為兄仍世儒術門內相師友侍宦學舍少即讀有

用書起家繼爲廣文官志立而行成推究所學以用世
家居嘗佐有司定民變東南兵起轉徙流落不少挫抑
仗劍入軍爲當代將相巨公所知作令畿輔號神君讚
所著時務論責望於守令者允踐其言馳驅戎幕當古
行軍司馬之任甲士鬪于津沽不動聲色而定之如昔
者應民變時其詩有云禍變消未然成功我何有抑亦
自道也已世丈之學深於史平生文章長於紀敘曲直
文簡皆史法也詩篇馳騁往復亦史家遺意顧入軍以
來書檄恒削其稿今所可見者文二十餘篇尺牘二卷
詩四卷蓋多孝弟敦樸之言有本而後有文足以名其
家者矣

讀書金筑坪寄子耘仲兄

登朝若不早有如夕陽明入山若不遠終未免俗情名山有
五柱餘杭一柱撐拔地十千丈不與塵世并中築天柱觀坦
坦數畝平吾師陳真人于此構佳壑誓欲鍊丹訣相與升太
清況有同游者時有潘子蔣子輩三人同游聯袂許唱賡豁然一長嘯拾
級山頭行回首盼來路足下青雲生

阿兄素憐我衣食常代謀依依如父母從無睽隔憂今歲發
狂興欲入山谷游阿兄不忍別送我至山陬到山日已昃一
榻且旬留約往洞霄宮明發窮探搜晨起須努力與兄閱歷
周忽然魂夢驚風雨聲颼颼念兄獨持家到此聞暫偷方擬
少行樂老天何相仇兄云莫怨天或者福未脩

冒雨阿兄歸送之山門前轉瞬下山去綠竹浮雲煙鶴立舉
步遲似覺中心煎明知咫尺遠並非各一天又如數日別並
非隔幾年生平丈夫氣奈何兒女然試問曷若此難以言語
傳

吾生而健飯斗米旬日完自從入山來心廣體更胖一卷爛
書本萬箇青琅玕對此常大嚼不必羅杯盤道人怪我癡瞪
目時時看問是讀書人曷爲狼虎餐搖手笑與語待我休寒

酸家有老年人念子心未寬聞我飲食健或者開歡顏請繪
大啖圖爲我報平安

登吳山坎卦壇望錢江

中原沸禍水漢家哀火德陸沈悲山河登場拓胸臆荆襄重
門開河洛寇氛迫西望湓浦郡樓船艤萬億南顧宣潤州金
粉皆荆棘何幸一片土吳山留突兀乘輿強扶筇慨然憶疇
昔五季有武肅臨安留發迹中興渡高宗東南保半壁煙火
數萬家富庶此稱劇然而國南方燎原殊不測聿稽炎宋間
大書燔宮闕泊乎近代來一炬城廂赤客言是離龍登高來
相宅下應七星缸玉皇山埋七星缸亦鎮郡城火氣上排八卦石我過龍神
祠風聲卷蘆荻俯矚秋濤館銀山頽沙磧江空雁孤飛放眼
天地窄山高雲亦低隻手星辰摘拱峙龕楮門萬里重關闕

飛舞鳳凰山形勝一州特越東過飛雨未來雲已黑潮平海
亦平漫天洗空碧似此好山川守土伊誰責之江號天險一
峰據阨塞鯨鯢誓不波風煙豈難熄金甌無缺破桑梓樂休
息拔劔斫石起長歌筆欲擲

馮柳孫

字稻孫嘉興諸生

白嶽庵詩話稻孫爲柳東太史孫世居梅里庚申之亂
避地里南王家兜賊至其弟芸孫先被執稻孫卽縱身
入水賊倒戈以拯之曰好男子毋輕生我不殺汝也益
竭力自沈家人七人從之芸孫亦不屈死一門殉難聞
者慟之平生力學立品家多藏書杜門
不出詩不多作真率樸素亦如其爲人

夜坐有感

江海日爭戰終宵淚幾升庭荒狐拜月窗暗鬼吹鐙賊竟如
毛襲人難插翅騰多慚孫百計索網歎無能

吳越將孫守蘇州以網禦賊

不得施謂之孫百計見獨醒雜志

徐伯璩

字雪黃秀水歲貢

溪上夜歸

一逕縈迴香篆斜竹籬茅屋野人家月明照見溪橋路開遍
淡紅煙草花

徐振熙

字緝甫嘉善增貢著秋心詩草

家傳略公少工詩屢試不售納貲得江蘇主簿未任歸
庚申寇陷嘉善集邑中義民團練殺賊議復邑城不克
之死

殘菊

豈爲風霜怨憔悴羞隨紅紫鬥繁華平生自笑違時慣看到
重陽節後花

戒酒

閉關休作頌罵坐竟無因爲惜杯中物難尋甕面春人情判

醒醉世事益酸辛
溝澮今能辨清修
不亂神

馬華鼎

字小異海
鹽貢生

題徐古春貽硯圖

執硯如執經
傳家珍世守
貞孝萃一門
蓄積斯能久
猗與東海君
才名播人口
持此硯一方
揮灑不停手
佳句傳藝林
奚啻千百首
自言少失恃
鞠育賴祖母
老父牽車牛
服賈米親負
自維家至貧
長物百無有
芸硯等芸田
耕耨儕千耦
良朋辱贈詩
貽我以瓊玖
旨哉君所言
質樸洵無偶
我老硯欲焚
吟詩參瓦缶
硯田已塵封
落筆增老醜
詩虎驟當前
追隨常恐後
羨君英妙年
善享千金帚
何況孝思深
跬步恆不苟
從茲益深醇
定可傳不朽
莫謂終不負
陶泓原執友

孫

謀

字意林海
鹽諸生

縣志謀工詩兼精峻黃寓郡城十餘年遠近求醫者踵
相接然日與儕輩論詩吟興不懈晚年歸鄉里與黃燮
清吳廷燮何岳齡諸人結社聯吟爲名
流所推重輯有全唐詩補意林詩話

石硯虹自郡中歸出示近作並攜褚二梅張玉珊詩見

示賦此卻贈

欲作昌言序含毫思邈然黃壚諸老盡白社幾人傳旅況依
孤燕秋聲答暮蟬吟箋誰賞識耳食縵雲編

沖和張水部明亮褚中書早歲竟如此長吟能起予煙波思
遠道海月照離居願訂論文約瓶山掃舊廬

許燕君字翼之石門諸生官湖北
縣丞著養怡山館詩稿

寄禾中友人

湖邊煙雨柳依依回首前遊迹已非憶煞故鄉風味好紫菱
青豆蟹初肥

錢祖蔭

字莆生號王橋平湖歲貢著水梅軒詩詞

縣志祖蔭學問深邃書法蒼秀性高雅風裁峻整一以樸誠為主族之未葬者葬之晚歲掌教社學專心督課不與外事

題俞松坪蘭坪同懷詩稿

千竿修竹繞疎籬風雨池塘入夢時想見高人吟興健壘篋

迭唱鬪新詞

秋水爲神思共清騷壇管領飲香名開編觸我人琴感洛社

於今少繼聲

馬承福

字訪雲平湖廩生著井養草堂詩鈔

馬承福序略予季訪雲性穎悟喜吟詩少從子春方先生游先生喜其資可造就舉黃文肅真實心地刻苦功夫二語相敦勉已先生遽歸道山陳君東堂移家與季鄰東堂爲之晨夕講論於是暇卽作詩詩成卽於東堂是正而詩乃日進

過秦望山下作

花外一犬吠橫塘水亂流秋風催落日山色送行舟帘影隔
村店笛聲何處樓言尋赤松子載酒續前遊

過莊辛田故居

故人竟爲憂愁死入室如聞歎息聲詩酒放懷聊復爾功名
到老究何成梨花庭院春無主楊柳村莊鳥不鳴貧賤交情
惟我在獨攜斗酒奠清明

和九日登弄珠樓

快上城南百尺臺豪情羣向酒邊開塔影雲撐出樹杪
秋聲雁帶來合座簪花仍故事舉杯看劍孰長才登高易觸
憂時念愁絕殘陽鼓角哀

王慶龍

字燮甫平湖增
生著復廬詩鈔

晚過野寺

野寺藏村落誰知別有天空山半林日古樹一溪煙門小纔容月橋低不礙船偶來得幽勝訪舊重留連

晚泊魏塘呈諸友

月盪波光裏人喧到渡頭寒鐘催落日急水送孤舟別久多離恨家貧少客游相逢更無語欲語轉增愁

鍾承藻

字芝臺桐鄉廩貢官孝豐教諭

遊爰山

一徑碧無際蒼茫煙影微危峰銜樹出亂石抱雲飛淺草襯游屐斜陽蒸客衣擬尋猿鶴侶偏是鳥催歸

趙筠

原名遜字萬雲號青士烏程恩貢著西谿草堂吟藁

高保康曰康與先兄祥伯同遊先生之門先生與弟莘字半耕並有夙慧同賦不遇所居書樓蒔花面水招生

徒十餘人互相啟迪書則縱論文史兼及藝事暮則挑燈共讀或自撰述或削生徒程課握管疾書言笑問答午夜各盡十餘藝率以爲常天懷超曠不營祿利承歡具慶雍雍偷庚辛兵禍流離播遷不二年間死亡殆盡又均無子遺墨悉燬風敗叢蘭尤可傷已

最樂亭觀太湖放歌

晴空競競聞震雷風聲水聲爭喧豨瀾漫浩溢一白杳無際
三萬有六千頃匳鏡開上有九霄扶搖之羽翮下有六鼈負
戴之崔嵬三吳壯觀何雄哉最樂亭踞金石嶺五湖全勢一
覽盡峰巒隱約天際浮空翠小大齊倒影天地黯慘雲模糊
鯨魚跋浪蛟龍趨陰房青熒出鬼火白楊蕭瑟日色孤鷗波
浩蕩疑有無恍如虛堂白壁高懸滄江圖一波纔平一波起
文成自然風激水東船西舫迎面過六幅蒲帆去來駛琉璃
世界淨無滓又如白地光明煥然舒錦綺吁嗟乎波瀾反覆

頃刻耳人情變幻亦如此我來登眺聽潺湲盪盪曾披膈眼界
寬停杯搔首問青天烽煙何時得洗滌故鄉迢遙隔雲端目
送南雲去不還獨立蒼茫思渺然

游法華寺

路轉峰迴萬木稠螺鬟繞出寺當頭靜霑花氣春如海遠送
湖心浪裏舟雲滂山腰黏翠溼濤飛松頂挾泉流遠公入俗
還醫俗煮藥焚香事事幽

再遊法華寺

煙嵐不改舊時青雲棧紆回喜再經方外苦難逃佛劫我來
無計慰山靈泉聲嗚咽流成淚僧舍飄零散似星可有桃源
在人世重尋早已失花汀

家鄉淪陷作詩代哭卽以自挽

旅人騫地策焚巢如醉如癡涕淚交四顧已無乾淨土更從何處寄衡茅

錢炳熙

字穎蘭歸安廬貢官湖北江陵知縣著挹爽軒詩草

贈沈評花

史

風雅如君亦我師論交深悔十年遲胸中邱壑都歸畫筆底煙雲盡入詩客裏有花春不負病餘無酒力難支游蹤預訂西湖約勉爾秋風折桂枝

謁于少保墓

奇禍無端召外藩頓教砥柱失乾坤北轅大有回天力西市終沈搶地冤自古忠臣多勁節坐令宵小起訛言我來憑弔斜陽裏一徑悲風動墓門

題家梅溪布衣詩草

杜牧歸來兩鬢絲湖山歷徧快題詩歌殘淮海春三月天與
先生筆一枝吟社問誰推勁敵長城底事怯偏師焚香不厭
千回讀句比離騷意更奇

寄懷孫補華

輕煙漠漠罨垂楊觸撥離愁暗自傷三月鶯花春易老五更
風雨夢方長人憐小杜吟偏嬾我學羊求興轉狂知否吳儂
尤好事簪花小詠細評量

過碧浪湖

一碧渺無際扁舟欵乃過鳥聲爭獨樹山影壓澄波林密暗
溪色風輕緩權歌紅亭白塔外何處弔東坡

嚴晉

福字凝甫號蟾香歸安附貢議

家傳略君性孝友多義行急公樂善知無不爲郡邑士
夫咸器重之讀書敏悟過人與兄章福參訂說文校議

議族兄鐵橋博極羣書自謂敏悟不如吾弟治經深于易旁通天文奇門醫卜之學尤精形家言著有易義通變先天法象圖說

義纂年七十四卒

盛兒生之前一夕內子夢人呼告曰四卯官復來意者

芳兒再生余家耶因紀以詩

奪我童烏百念灰金環羊祐喜重來夢中慰語知誰告
遺書待汝開敢信聰明仍故昔即論頭角漫疑猜
啞啞入抱如相識記否人閒第二回

感興

商飈倏又至山村木葉衰庭柯半搖落叢桂獨含滋
感茲悟物理榮悴各有時得時或先後何論速與遲

訪謝靈運故宅

即謝村福田寺

蠟屐公何往風流此尙存雲深不知寺地古自名村
慧業應

成佛烏衣幾子孫我來閒散步林色射朝暎

孫錫疇

字松巖歸安諸生

許莊祥曰松巖先生才高不遇雅好吟詠嘗有句云落
總十年悲杜牧銷魂一賦感文通風塵落拓言之慨然

秋感

轉眼秋光易回頭世事驚囊空逃酒約才窘負詩盟戎馬嗟

多故儒冠誤此生雄心灰未得向曉聽雞鳴

王

璉 字逸仲歸安諸生
著緘石集逸園詩

朱祖謀傳畧先生弱冠文名藉甚以流觴曲水賦受知
學使周翰臣先生冠童子軍庚辛避亂鄉居與同郡陳
秋谷戴子高兩先生結文字交詩學日進癸後家中落
以致讀自贍課諸生向嚴肅而於入孝出弟書旨反覆
開導妮不倦

淨性寺

野寺寂虛籟空庭花木深行行來上界薄薄見春陰
芭屨黏

泥重秧田積水深誰憐蕭瑟裏有客獨登臨

王孝穆

字次陵鄞人
箸半農詩稿

螢

慣逐迎涼客流光輒滿庭渡波星共白經雨火猶青腐亦能
成物明難自鑿形隋皇恩不薄故苑惜彫零

徐棠

字伯懋號南喬慈谿
諸生箸寒碧齋詩稿

偶感

歷盡冰霜劫蕭寒苦自禁武林雙雁影迢遞悵分襟

中秋見月

靜掩重門祇自憐沈沈月色夜窗前團圓依舊家何在忍對

清光憶去年

費邦翰

字屏周號曼書慈
谿人候選主事

董誥曰曼書家小康有廬肆在甬東讓於諸昆季而棄之循例得官謁選有期而亦棄之兵燹後故居遭熾經營締造旁築園圃雜蒔花木錫詠其中高尚士也

自題

靈陽故居歎一炬吾愛吾廬聊葺補蔽遮風雨亦苟完奚必
杜陵歌廣宇開軒隙地無三弓舍南一畦畚鍤聚波稜火熱
能充飢呼童拾棗更作脯客來有酒亦有肴園蔬自比珍羞
愈其閒荷鋤多暇日癖古閒搜書畫譜頤性老人留墨妙隸書
半圖我迺取之榜蓬戶潛居得遂耕讀情猶是先民風太古
二字

許秉辰

字又村山陰人
著夢巢詩草

薛時雨序略許君又村其詩根于天性油然而孝弟之言其騷屑感憤吐洩懷抱抑塞磊落之致尤溢于言表

溪行夜泊

溪山夕澄霽明月上東嶺長空淨纖塵涼夜散清景烟低叢
篠出水落漁梁靜蟲語青莎根猿嘯亂松頂沙禽時一鳴殆
爲零露警秋籟增蕭寥夜風助清冷仰視銀河高始覺秋夜
永舟子方醉眠客心轉淒耿颺颺疑有人船頭菰蘆影

旅夜聞溪聲

結廬亂山曲溪澗聲泠泠夢破疑寒雨窗開見列星含風干
樹靜倚壁一燈熒鄉思和流水終宵殊未停

夜渡黃河

木落雁驚秋黃河急夜流劃開南北界瀉盡古今愁燈火長
隄閃星辰濁浪浮乘槎尋舊路會向日邊遊

暮望

荒城日初暝靄靄生夕霏疎星爭月上倦鳥隨雲歸萬物皆

有託而我獨無依
悵然嘆行役
秋風吹我衣

水宿

孤艇宿煙潯
新涼枕簟侵
月明村樹迴
燈暗佛樓深
蟋蟀生

秋思星河澹
客心倚舫望
空闊夜色正
沈沈

周 觀字笑巖
山陰人

養自然齋詩話笑巖家貧嗜學見林泉之勝輒流連不忍去終身不謀家室無世俗之憂疾革語弟子吳介唐講曰身無長物惟半帳殘稿是吾性靈中物也其謹藏之既卒介唐為付梓如宿鍾山寺云綺語未除求佛懺俗緣多累愛僧閒贈寶馨上人云身離苦海形如鶴道在名山氣似龍之句皆可誦

齋居

花片紛紛點客衣
閒吟時復倚柴扉
夕陽村外無人迹
尚有

銜泥燕未歸

傅延年

原名以紳字吉甫會稽歲貢侯選訓導著凌霄花館文詩藁

村居雜興

一椽破屋暫盤桓
心靜何憂室不寬
羈客愁多偏畏酒
敝衣春盡不知寒
並無長物移家便
賸有空囊入市難
門外青山依舊好
閒來權當畫圖看

趙炳璿

字玉衡 會稽諸生 箸小松雪齋詩藁

孫樹稷曰先生熟精史學怡情詩酒卒年六十有二抱伯道恨楹書失託生平著述散佚無存乃集稷素所誦習及留稿於稷家者錄而存之

遊七星巖贈沈味巖雨巖昆季

柯山鑿石石不死
一巖終古村邊峙
斧斲闢破混沌胎
七星得名從此始
瘦沈花萼煙霞仙
依巖結構成洞天
於茲棲隱作巖主
巖乎巖乎何幸焉
主人家住山陰村
村中乃是桃花源
殘兵亂燹不能入
斯巖亦似靈光存
余好探奇賴奔走
屐

齒不到昔真負燹後故人一一來相約暢遊攜斗酒南塘路
曲記不明十轉五轉遶山行摩崖瞥見字如斗一笑頓覺雙
眸清仰觀豁我懷俯視怡我心浮嵐飛翠突迎客訇然中有
危厂深芙蓉朵朵插空際削如峭壁擁如髻天然廣廈壁窠
書吳君在前沈君繼巖頂天然廣廈四字為前明吳尚書岱
書歲久漫滅今沈君夢蘭補書巖側
旁戶小於盞出此倏開敞上有八卦壇曠處不盈丈石磴可
坐闌可憑蓬瀛咫尺恣延賞壇上額曰蓬瀛咫尺一泓池水涵虛碧環
池屈曲平橋隔山溜時聞殘滴鳴蕉陰不放炎曦赤或銜尊
中淥或讀壁上詩數年以來無此樂侘僚幸有名山醫曩遊
曹吼歎奇絕及見此山心更折恨無羽翼供翱翔凌風直探
星精穴吁嗟乎秦淮金粉餘劫灰明聖湖頭燐作堆鑑湖一
曲好珍惜欲去依依首重回

馬傳朱

字榮舫會稽諸生候選光祿寺署正著碧梧軒詩鈔閩游小草

緝雅堂詩話君為春陽前輩弟父百慶由進士官福建君嘗隨宦縱遊八閩山水之勝詩筆尤縱橫跌宕歸里後值辛酉之難遇賊不屈死之蓋才士之有氣節者惜未竟其用也

過黃山

雨過水聲急日午人影小絕無飛鳥鳴惟見層雲繞瀲瀲清
風生滴滴靈泉悄怪石作人立枯樹隨巖到林木既深邃煙
霞極縹緲危磴高且滑古徑曲而窈不懸堇父布絕壁何由
造不叱王尊馭奇景何從考既欲舉趾高又怕輕心掉亦知
一蹶休無奈四面好願化千百身一一窮搜討

至淨名寺小憩寺僧陪游諸名勝

山僧好山兼好客為我引導登高岡重巒疊嶂屹相向煙雲
離合迷青黃初入山口頗寬綽麤沙大石塵飛揚山腰漸轉

漸逼窄尋途曲曲盤羊腸更學振衣厯千仞踏石石動身欲
僵名山自古絕攀附並無藤葛無松篁兩僧扶我買勇上一
步一跌神徬徨忽若登天忽墜淵厯盡險阻見康莊天梯石
棧巧相接畫圖幅幅屏風張一峰突兀勢如削卓立雲漢凌
穹蒼一峰橫空好長臥青天作幕地作牀或捲暝霧散天雨
珍珠萬顆鳴鏗鏘或臨深淵漾晴靄倒衝水底追沈光靜如
老僧入禪定豔如美女修明妝猛如將軍擁大纛峭如奇士
垂空囊紛如地獄列變相森如劍戟騰寒芒如排蜃氣幻樓
閣蓬蓬勃勃窮微茫如舞刑天炯雙目狗鬪猿戲蒼鷹翔爲
獅爲象爲虎豹或凹或凸或昂藏雁宕有圖不能繪雁宕有
誌難盡詳眼前一一互羅列目空四表渺八荒我聞上古未
開闢水石搏擊風輪忙山川盡納一粟內點熾鑪炭融陰陽

清者為氣濁者骨罡風一陣吹遐方年深月久化為石胚胎
 萬載經風霜遂使山靈弄狡獪妙幻不許人窺量不然鬼斧
 縱云巧豈能到處施鋒鋌石不能言暗點首知我此語非荒
 唐夕陽在山人影亂歸途仍賴僧扶將

淨名寺題壁次儀徵相公壁上韻

峭石連峯合層梯夾徑斜綠陰頽壁薜紅韻妥山花廚飯炊
 蓮稻巖泉品雪芽禪房容信宿清夢逐煙霞

陳家保

號子長蕭山廩貢候選訓導著聽雨樓筆錄十二卷

送姚又泉之臺灣

一幅蒲帆一葉舟東征爭似水東流知君今夜宿何處月照

孤篷海驛秋

越江烽火接吳山回首家鄉淚欲潸何日蒞鱸酬素志滿邨

黃葉掩柴關

自崧下回蕭山留別同社諸友

故國烽煙靖歸舟一葦杭時平還舊業客久戀他鄉別恨隨
流水孤帆趁夕陽今宵定何處明月滿清湘

傅墨林

字廣森號書田諸暨諸生箸野
花草堂詩集諸暨縣志補訂

秋夜卽事

頻年羈旅感勞薪塵榻荒涼寄此身風峭釀成秋意思霜高
添得月精神寒螿慣逼殘更夢孤雁偏驚異地人剛得短檠
消寂寞燈如紅豆又思親

嘲柳

春柳依依三五條陶潛門外自飄搖緣何未解先生意纔遇
東風便折腰

陳其彩

字少湖上虞廩貢官餘杭訓導

口占

末路生涯首猶盤殘碁一局太無端歸途漫作羨魚想往事
聊同失馬看千里逢迎知己少半生磊落告人難春來不覺
詩瘠瘦楊柳風尖撲面寒

小寒食得補山書

滄桑歲月儘蹉跎百五春光愁裏過舊學敢誇高足好餘生
轉厭此身多與君一樣流離態引我重翻懊惱歌正是蒼南
迎賽候別來風景更如何

陳春暉

字瀛東臨海廩貢官玉環訓導著聽秋吟館詩草三卷北游草三卷春江小草一卷

雙硯齋筆記先生司訓玉環凡九年課士之暇尤工吟咏

登巾峰精舍

竹杖閒挑酒一尊，登高試上白雲根。
秋風落葉僧歸寺，明月空山鶴守門。
隔院鐘聲清客耳，小窗茗椀沁詩魂。
閒看朱子留題句，古壁模胡字半存。

蓋竹洞歌

天台山高四萬有八千，靈仙窟宅古所傳。
平岡東走百餘里，幻出仙家第十九洞天。
小徑羊腸盤屈曲，萬个青蒼挺修竹。
寶蓋紛紛夾道遮，風捲翠旗拂天綠。
懸崖拔地聳崔巍，訇然石扇當中開。
灼爍蓬萊闕，照耀金銀臺。
瑤草琪花自掩映，石牀石几無塵埃。
對面高挂千尋瀑，飛流搏激浪花簇。
天門峰對香鑪峰，茶園地拓西山麓。
洞中舊傳兩女郎，雲霞爲佩月爲璫。
凌空駕鶴同翱翔，我今采奇坐石室。
四面清陰翠欲滴，瞳瞳紅日懸中天。
梵宇琳宮皆金碧，須臾夕照銜西山。
人在

雲烟縹緲閒雲中飛下雙白鶴知是仙人朝出而暮還仙人
還兮可望不可即但聞石井橋下流水聲潺潺

夏

疇字子範黃巖人
著培風閣詩鈔

縣志疇天資英邁博學多通詩文尤奇古一洗纖庸之
習晚攻經學力宗漢儒說著有毛詩酌解纂義三十卷

泊舟韓莊牖

倦遊孤客感離羣醜酒臨風日又曛獻策誰收買太傅登艦
空憶謝將軍漳流近接渾河水海氣遙蒸泰岱雲極目江南
哀思滿吉占何處問靈氛

何映潢

號星槎臨海廩生其饒
子箸尚書辨疑四卷

應寶時傳略星槎事親有至性家貧館於外定省無間
為文筆勢颯舉與人無城府有談人陰私者必怒斥之
偕兒子炳麟侍家大人夜坐

歲暮宵深際風寒雪到時煨紅資論史浮白助談詩一老精

神健諸兒骨格奇吾廬真可愛安命淡愁思

俞鳳岡

字荔村東陽諸生
著月椒草堂詩草

讀陳毅齋師正學編

道存鄒魯後人在崑峰巔一代修儒業千秋正學編

霜雪久侵檐春風自入簾酸鹹嘗欲徧蔗境老來甜

指南新語錄面北舊門牆久別春風座猶聞一瓣香

葉鴻政

字平卿又字次香西
安廩貢官金華訓導

西安懷舊錄次香有書名詩不多作必發於至性至
情司訓金華十餘載遷調湖北縣丞以年老不赴歸里

生輓鄭琴浦

茂陵秋雨隔窗聽涼夜吟哦我獨醒雙鬢不堪愁裏白一燈

可憶舊時青前身蝴蝶曾無夢今歲龍蛇可乞靈猶有中山

千日酒空山來勸少微星

詹大愚

字養成開化廩生箸柳溪俚草

汪君殿先集邑志殉節諸賢祀于書齋感賦

祀事關風教前賢有典型招魂猶昔日薦酒肅中庭骨已埋
荒草神應作列星多君慕忠節深夜淚飄零

張應庚

字孟仙永嘉廩貢官廣東連平知州著寄鷗隨筆寄鷗吟稿

梅州署中寄黃鶴樓

經旬塵市作句留偷得閒身汗漫遊涼意漸添桐葉雨山光
濃壓木蘭舟猪肝閱貢原多累龍肉稽康未易酬料得鄉懷
千里共連朝風信報新秋

松口道中即事

曉起愛山行嵐光潑面生東風開柳眼危石咽溪聲鳥語深
林碎花香隔岸清不知程遠近高下亂雲橫

禪房卽事

空齋寂無人清磬出深樹采藥僧未還亭前試微步背寺幾
青山煙鬢偶然露幽禽下荒苔銜花自來去

聽松軒

家南山先生別業常箸書於此
在羊城大通煙雨爲八景之一

不知行遠近松裏一柴門竹徑斜通路溪流半繞村泉烹山
茗熟香護鳴爐温活潑皆天趣何須問性源

登攬湘樓

樓在長沙城南

一帆天際遠暝色下遙岑山勢連吳楚江流自古今鐘聲煙
外寺落日水邊林無限登樓思瀟湘又暮碁

孟冬虎門于役候潮

玉漏聲殘客夢回虎門東下片帆開南荒地暖初聞雁庾嶺
春生欲放梅霜氣打篷漁火冷西風吹月夜潮來自憐兩鬢

蕭蕭髮愁聽江城鼓角哀

朱鼎元

字調梅錢塘人成豐乙卯舉人官武義教諭

養自然齋詩話余庚申春始與調梅訂交嗣後蹤迹離合不常書來輒數千言肫肫以勤學相勸見子作詩為剖析詩之源流與學詩之流弊朋好中忠告無有踰調梅者所作古體始學徐庾繼乃辨香鮑謝七古亦不煩繩墨而自有旨趣

杭郡詩三輯調梅性介特朋友有過輒斷斷相規劇不少假於所心折又激賞弗去口嘗語其弟子揚文瑩曰吾為人如吾文無復合時宜矣

寄鍾兩辰 駿聲 都中

遠道嗟久別想君平生顏尺素寄遙情難盡千萬端處貴不
忘賤居獨思眾歡中夜步前庭落葉驚早寒明月在流水微
風起波瀾圓影忽破碎何由得團圓

懷山中舊友

身在白雲外，卻憶山中人。一臥不復起，幾歷桃花春。夜讀溪
月高，朝游麋鹿親。有得不著書，煙霞賁經綸。垂竿有尺水，步
屨無寸塵。巖壑自太古，草木隨時新。何時拂衣去，結茅青澗
濱。永絕人世緣，長與巢許倫。

寄金少白

日修

欲雪不雪雲陰陰，歲晏寒入千山深。溪凍不流石高出，何人
踏石來相尋。消寒時進一杯酒，酒薄豈足救頽朽。一領羊裘
遠寄來，故人於我情獨厚。襲以舊時破青衫，裘長不蓋毛氈
毳。衣向北風腰背挺，獨探梅花步陰嶺。欲折高枝遠相贈，踏
破斜陽弄疏影。

日暮閒望

野曠人來少，天寒日易曛。就隍成獨立，垂老憶同羣。霜重無

留葉山深有宿雲歸鴉爾何晚鳴噪欲誰聞

示姚生六鈞

明月入虛室衣袖生寒烟顧惜清景好夜半猶未眠憶昔與爾父佔畢青燈前意中忽有得竟夕自披研涉世各疎懶厲志同精堅存沒既殊途喪亂復幾年爾亦自刻苦寒暑手一編儒業苟有成生死兩釋然

寄夏子松

日夕雲重沓何由見遠山寒蛩空自語飛鳥結羣還欲與故人會翻愁行旅艱相違五百里入夢暫開顏

吳錫熊

字書生錢塘人咸豐乙卯舉人著東門草堂詩鈔

丁丙曰畫生家海鹽構世營鮭筴羣從翩翩才華豐蔚時高茶盃好詩詞范樾木嗜金石畫生左宜右有相得益彰辛酉亂後家室淪亾獨居滬濱憂能傷人風韻頓減既而勉上長安續昏王氏蟾圓幾易鸚賦旋悲以哲

弟琴洲之
子為嗣

唐棲舟中見拆塘築堡同高仰周續會茶庵望會感賦

白雁一叫冬青衰玉潛義士浮江來此閒一片乾淨土樂飢

栖息衡門開福藩遠扈三宮去舊邸荒煙在何處臥龍橋外

水湯湯終古東流不能住張家一瞬據三吳開濬新河役萬

夫連河即至正開張士誠發吳從此下塘西畔路舟車水陸

是通途蘇詩明朝歸路下塘西似塘西之名北宋已稱不知

道勞勞羈旅戒行李望洋而歎十二里有名三里洋十二里

耳逃藪商萑苻草竊菱蘆叢挽瀾誰作中流砥鱗鱗塘石固且

民苦之堅民無病涉往來便大書深刻紀利濟塘石上刻有任事端

推施國賢正統七年巡撫周公忱從北新橋東至石門縣界

便之康熙九年總督劉公兆麟范公承讓酌修水閘一千二百

百六十三丈每丈工料費入兩坍塌石塘一千二百二十五

丈每丈工料費四兩七錢無石塘一千二百二十五丈每丈

工料費五兩費用四萬金委耆民施國賢董其事歷一載築

成石塘四千三百八十三丈橋六百二十三洞以工費不繼

未及竣事國賢擬一護塘庵令僧居之俾資修補乃以借

用司庫銀兩下獄國賢賣塘栖屋國賢奉檄志慨慷糜金四

以償得釋論者為任事受累惜之

萬公私帑及期三百有六旬壘石四千有奇丈百年而後無

偏頗益見當時工力多護塘庵築亦良法以罪償功理則那

平平蕩蕩歌王道跳梁小醜稽天討備倭有例議城棲嘉靖

四年六月倭寇塘栖鎮郡城戒嚴自塘栖至北關直抵武林

門沿途放火鄉村燔燒一空總督尚書張公經統兵禦之大

戰于塘栖敗績先是撫院王公仔下令議城塘栖其費半出

官帑半出巨室一時靳於捐貲羣陳不便於按院沮之措哉

伍林港口宜修堡衡文使者武備兼倒海移山軍令嚴禦寇

防川難並顧截長補短有何嫌緯夫站站水中墮賊勢縱橫

足亦裹嗚呼行不得哥哥真箇金湯北門鎖青邱兄弟休長

歎有臺日日報平安不是石經移太學遺民白塔哭江干

張清華

字湛園號晴江秀水人咸豐乙卯舉人官江蘇陽湖知縣著伊吾集二卷

家傳略少好學敦孝行工詩古文辭除陽湖令下車即問民疾苦興利除弊如濬玉帶河興書院設義塾闢荒田為公桑地購湖桑萬餘株聘禾人之精其業者躬率以栽植之蠶桑之利因之大溥

遊觀音巖

天涯同是宦遊人燕子磯頭載問津碑石荒涼埋碧蘚寺垣

零落黯青燐雨中箸屐探名勝石上支筇證夙因僕僕關河

頻太息萍蹤何日息風塵

施文銓

字壽民號怡雲安吉人咸豐乙卯順天舉人著怡雲山人集

府志文銓學行醇粹主講直隸獲鹿書院有心得隨筆記之辨證明確於安吉掌故多糾正在所著靜學廬筆

中記

縣志文銓博學能文尤工古文辭與歸安於藻齊名為時所稱初遊京師歸安吳增嘉見其文以女字焉嘗掌延慶正定講席陶鑄卓有成就

兩浙輶軒續錄

卷四十三

張清華 施文銓 何琳

三

竹三入

將南歸寄畢大正疆

委巷論交早，良時輒往還。談元傾白墮，得句對青山。落月天涯夢，清風釣渚閒。遠游吾已倦，計日款柴關。

何

琳字友珉號韻仙勤人感豐

烈婦吟

卯舉人箬雲石居詩稿
婦氏方張夢生妻也夢生病革願以身代先
一夕而亡夢生名慶松補諸生卒年三十

吾聞望夫身，化石未聞代。夫先命絕，又聞杞婦哭。崩城未聞夫病婦捐生，代夫捐生世罕有。得諸吾友張子婦，婦年二十歸於張，畫眉京兆本才郎。一旦夫病忽告急，鏡黯菱花空掩泣。輕身一死赴黃泉，欲挽造化夫命延。吁嗟乎婦豈不知有二子，一念堅貞烏能已。又豈不知有邁姑，此念轉移胡爲乎。人謂烈婦死無益，我謂烈婦不易得。婦今與夫如昔時，鴛鴦冢上碧草滋。百年同歸分久暫，吁嗟張子可無憾。

將出都門有懷徐舍人 時棟

飛風捲塵沙吹我遊子衣
天涯望明月故人感別離
別離分兩地一日長相思
相思不能寐容顏入夢時
昔君北遊日送君河之湄
恨不偕君往著鞭同笑嬉
迨我東裝去幽燕新驅馳
因君來送我我問君行期
君言春正月出門定不疑
屈指二月盡見我於京畿
我舟江與淮我車鄒與齊
望見春明門我馬初脫羈
念我索居日長安多故知
謂宋蓮叔觀察令弟子舟比部童薇研太史
今我來不易舉日知音稀
時諸君皆歸里中日日望君至
有酒斟酌之輪蹠駐門外
謂是而竟非忽見紅杏開
春色盈鳳池羨彼年少郎
翩翩新折枝 謂趙粹甫盛蓉舟 天香開隔樹
顧影殊自悲睽君四千里
山巔復水涯殘燈明旅館
苦吟而獻欵平安寄君信
近狀吾無欺天街車僕僕
官橋柳依依相見已不遠
快

觀君丰姿話舊出西郭

時君新居城西

示君都中詩會當尋舊夢行

色春風催木天與薇省位置君並宜知君不我棄一鞭長追

隨

淨慈寺

寶刹千年蹟禪堂八月風雲歸羅漢袖山捧梵王宮汲井明

秋水

寺中有圓木井

憑闌望遠空鐘聲何處動落日寺門紅

西郊暮望

芳郊抄得路彎環信步緣谿意自閒秋水詩情流一葉夕陽

畫意綯千山雲沈遠浦漁歌起煙散疎林倦鳥還獨立蒼茫

不歸去爲邀明月出松關

陶守廉

字肖農會稽人咸豐乙卯舉人官江蘇寶山知縣

寄懷韓螺山

分手衡河動經歲故人消息想應佳
出山小草難爲藥繞屋寒梅定作花
憤借濁醪澆塊壘愧無好句鬪尖叉
英雄乞食尋常事細數君家與我家

張

本

字惇甫仁和人咸豐乙卯副貢官奉化訓導

辛卯長夏偕琴溪表兄避暑自有餘廬

碧影半庭遮閒居與轉除愛山因疊石貯水爲澆花宿雨枝

頭潤清風徑外斜曉窗剛睡起爐畔試煎茶

小院攤書處會無滬暑侵地閒人自靜園古樹成林敲石待

明月凭闌聽暮禽此中幽趣足何必撫鳴琴

温汝超

字次言仁和人咸豐乙卯副貢官西

張景雲傳略君性沈摯善談諧文壇樹幟垂五十年乙卯始登副車庚辛劫後家室蕩然就冷官以終年六十

有七詩文皆主性情屏華藻當謂文字非心坎出者皆

浮詞也詩皆亂離時作與趙忠節唱和居多家貧子幼

張本温女選

尚未
乘行

呈趙竹生先生

久仰龍門百尺增荆州初識興飛騰困胡自信同蘇武負漢

何曾學李陵得句淚流書激烈先生有絕命詞
五首密遞滬上談兵色變露

峻嶒丈夫遠志如鴻鵠皮裏陽秋莫作憑

經文緯武抱奇材天遣星靈應運來蟾窟探花標虎榜貂冠

繼葉上麟臺擲盧表赤心同鑿轉綠回黃局漫猜對酒酣嬉

還大笑輕生溝瀆太無才

滬上聞竹生先生正命蘇州詩以寫哀

上界星辰墜地流吳雲慘淡鬼神愁保全臣節無遺憾誓報

君恩此斷頭贈別三言先六日三月十二余出賊中先生以
決密速三字為贈越六日而

先生正命矣全歸一笑竟千秋遇害日仰天大笑罵不絕口人問正氣歌能續

衣帶還凭大阮收先生絕命詞五首先密寄交令叔吟蕉觀察

王謝家風闕閱彰一門忠孝達

天閭子能知父甘先死先生長郎十二歲在楚南聞湖郡陷知先生必死即日殉之城定

難全矢與亡浩氣凌霄驚鬼蜮鐵心貫日懾豺狼殘骸不恤

遭鬱割橫草飛燐骨最香

眼前同難憶吳門略分論交古誼敦讀序淚多緣我濺先生讀余

自序每為之淚下酬詩心苦共君捫口惟罵賊狂呼蓋志為尊

王屢設樽除夕元旦先生與余邀同人踐歲圍拜示不忘本朝正朔也宋玉果然遲解纜

相從何待賦招魂賊害先生之日搜捕余甚急

鄒在官字叔與號東生滄子錢塘人咸豐乙卯優貢官內閣中書

樊芝生曰東生秉庭訓寡言笑弱不勝衣及為文則雲奔濤涌才華之富不以尺幅限乙卯錄優行

朝考第一兄蓉閣存句云闔門媿說三優貢御覽頻邀第一名蓋仲麋栗園均選優栗園

朝考先第一也庚申避地漁山與周葆儒黃上水
集圍練以積勞卒辛酉冬杭城陷其妻程殉節

雁塔輒爲劉燕庭方伯賦

天風吹折金蓮朵六級浮圖同日墮法鈴無語劫灰沈殘碑
半仆蒼煙鎖蒼煙漠漠認前朝遺址初枕亦寂寥禮佛有人
瞻拜去登科幾輩姓名標壞基當日因無漏永徽建號三年
構七宮財帛出天家兩字慈恩叨佛祐佛相莊嚴頂禮多兩
廊畫壁肖維摩自從烈焰飛塵火遂使零輒感逝波題名尙
有宣和刻一例消磨求不得嗜古難矜石墨存尋碑已被苔
花蝕滄桑幾見歲華更有客城南訪古行入手牟尼如一串
關心字畫認分明雕鏤陰面尤殊像世尊幻出跏趺狀迦葉
阿難侍法王文殊師利超諸相還從書法辨淵源八葉摩抄
拓幾番頗似殘銘書敬客不教多寶擅平原當年聞喜蒙恩

賜進士魏科傳盛事攜得泥金報捷書題成淡墨籠紗字可
惜瑤光燬梵宮高標無復摩蒼穹不然一一親撫揚千佛名
經儼在中長安車馬紛紛走此甌埋沒千年久留得金剛不
壞身要憑墨客題詩手墨客題詩興不辜慈雲一片到西湖
世家好續登科記暇日重摹博古圖金塗忽憶錢王勅精繆
六寸玲瓏樣遺製難尋窳堵波現身誰示光明藏瓊槌不惜
付雙鉤筆墨初唐共討按善業真如身永在華嚴字母數堪
求甄文凡尋幽昔記遊東魯鐵幡遺塔巍然古地脈無端吼
怒鯨塔尖一夕淪塵土銅質爛斑色黯然三規竹節比勻圓
宦囊壓得歸裝重官閣猶存考古緣庚寅山左地震家君方
塔尖墮得銅規如甬者三比到錢塘江上立六和塔下波濤
枚塔爲金熙宗二年建急鈴窗畫檻已傾頽斷壁零璣供掇拾我公阿育是前身花

雨東南灑去勻八萬四千修塔手可能重見法輪新

丁未重九同遊瑞石洞

約伴入林薄登高可遠望市聲聽漸杳江影落微茫怪石有
奇趣山花無俗香飛仙渺何處樓閣尙斜陽

杏樓招同曉樓諸君集蓮衣上人浮碧軒蔬食後泛舟

孤山卽步元韻奉題探梅第二圖

香浮孤嶼影當門更著青山兩岸屯蘇子出句雪後本宜高士臥

花開惜少翠禽言游蹤喜結勤思伴畫意曾摹笠屐痕曉樓爲子

作東坡便擬舫船持藥玉濁醪一盞試先温年例臘月十九祀東坡先生於

湖上

戊申長夏毘陵舟中雜詠

梅雨連朝未放晴驕陽今日送人行樹陰夾岸綠如海纔聽

新蟬第一聲

寒山路轉不聞鐘
水遠橋平又幾重
天意似憐無點綴
故教雲勢作奇峯

魏丙慶

字恭儼仁和貢生
官江西弋陽知縣

寄松生嚴州

不釣浮名過釣臺
此行端為賦鴻哀
人推敬禮文章好
我更多君濟世才

富春山水接桐廬
縮項鰻魚味最腴
紅樹秋江如畫裏
新詩添拾錦囊無

朱允元

字克庵仁和廩生
善橋東草堂詩集

許淮祥曰吾師克庵先生
劬學好古醜粹經史弱冠文
名藉甚聯體辨香徐庾書法
入晉賢之室工詩搖筆落
紙克追羣雅居省垣東橫河
橋蔭喬木枕清流琴軒酒
榭二三知己歎詠其中成豐
初葉先府君聘師至吳門

授余兄弟讀又喜講求金石居二載以母老歸後移家
婺州尋卒子亦瑒著有蒙齋經說四卷橋東草堂詩文
集若干卷藁本未聚兵燹散佚後死之賁欲盡末由悲夫

戊起鐘歌咸豐乙卯許珊林先生
得於淮陰市上自有記

辛盤庚鼎世不傳人閒拓本直萬錢神物何來古彝器土花
繡蝕三千年天意欲教瓌寶顯甬廂決口洪波連鄭重如獲
雕陰鼎寶貴遠過太康輒到眼不辨蝌蚪字觸手疑有蛟龍
涎野人棄擲不復惜黃鍾瓦缶混市塵高陽太守性耆古家
藏舊物富青氈入市驚觀希世寶雌尊虎卣侔精堅濯以酢
漿煥光采頓慰平生金石緣夏后琬戈應儷色岐陽石鼓可
比肩薛氏款識未及收撫拾星宿羲娥捐積古摹圖據王本
千秋贗鼎恣搜研我聞殷人器尙質形製古樸無雕鐫想見
龍旂承祀日聲與鼗鼓同淵淵卽今流傳吉光羽寶氣直欲

照坤乾持作廉吏壓裝物何必更誇鬱林船況聞君家古均
閣雙鉤之本工且妍周鐘虢叔形細拓漢碑夏承詞獨全此
器權輿在子氏考擊自古列宮縣世閒瓊蠟尙未到隨珠和
璧難獨專何不摹拓億萬紙云回古籀體重箋東南藝林齊
寓目置身恍在周秦前

七姬廟

并序

七姬者潘元紹妾姓徐翟陳羅段彭卞氏元紹爲張
士誠壻明兵下蘇州士誠遣元紹迎敵戰敗死七姬
同日自縊以殉士人立廟於齊女門外今尙存余過
其地作詩以弔之

平江戰罷鼓聲死伍胥門外成廢壘淮張霸氣黯然收十萬
金甲不可恃健兒束手豎降旛頓覺兜鍪愧羅綺美人一死

報將軍差強人意賴有此憶昔割據三吳置名區繁麗誇金
 閩伯符欲据江東地臣佗已稱南粵王將軍尙在復拜爵笙
 歌日夜酣華堂前擁貔貅後鶯燕金釵羅列粲成行臨濠真
 人赫斯怒闔閭城邊連營駐將軍自誓好頭顱擲付沙場不
 回顧七姬羞逐胡笳拍一霎穠華委朝露直教同根姊妹花
 併化連枝旌節樹吁嗟乎虞姬畢命隨重瞳烏江日暮生悲
 風綠珠願爲齊奴死金谷至今花不紅女兒心事甘玉碎後
 先輝映彤史中廟貌儼然珮環聚疑有貞魂泣風雨流芳合
 媿劉夫人齊雲一炬同千古

張士誠妻劉夫人
在齊雲樓自焚死

錢

字監卿號百生任鈞子仁和人
官兩淮鹽知事善玉照堂詩藁

鄰在寅日百生自幼積學好吟咏精篆刻胸羅史傳文
氣超邁千言立就性抗爽遇人急難輒爭先赴之善集

蘇詩別爲
百東坡集

丁未仲冬蓉閣出詩集索題因集坡公句

仕宦豈不榮出處付前定斗水寬百憂得句輕干乘子昔少
年日低回客京轂文如餅水翻一揮三千幅云何走衣食朝
燕暮荆蠻別君三十載摧頽各蒼顏相逢更何言感歎執我
手憔悴難具論艱難問升斗居杭積五歲仰給苜蓿槃強爲
醕一酌飽食不自安薄俗徇世榮吾儕眷微祿古有爲貧仕
卑官未云辱楊公海中仙柔翰羅萬象詰曲古篆字手板迎
官長楊蓮卿工書法頗自負後亦援
例府椽名刺作小篆亦一奇也文章固虛名悲歡浩無
垠淒涼五君詠僅存今幾人豈無故交親不救歸裝貧汪氏
寄母
丁未季冬逝世回思十年事使我空涕淚寵辱吾久忘所感故人意
不謂廣陵城三年已四至子從徐方來下馬鬚眉黃繫馬門
前柳幅巾登我堂探懷出新詩已作冰玉光百篇儻寄我盛

之宜錦囊度君多才少君才亦圭璋文章乃餘事吏能復取
長與子同一邦嗟予獨愁絕龍鍾三十九不作一錢值吟爲
蝸蝨聲放懷語不擇君看東坡翁與世不相入吾窮本坐詩
吾詩慎勿刻

余

贊

字伯慶一字纓廷仁和諸
生殉難贈雲騎尉世職

余林曰先府君精岐黃治病多奇驗子兄弟親承家學
先兄纓廷遊庠後棄舉業益專攻其術時歸白嶽故里
施濟貧病遠近德之同治
癸亥寇至被脅不屈死

古詩

食梅知味酸履冰知天寒不經別離苦焉解會晤歡夫君去
千里跋涉形影單山深豺虎噬江險蛟龍餐登樓緬長道歷
歷摧心肝妾身何足重堂上多悲歎

鞠華秋始黃柏葉冬猶綠幽貞盟素抱不以媚薄俗萋萋原

上草當春何繫縛履齒染餘薰蜂蝶競相逐一朝霜風至憔悴滿河曲古來樂道者因茲淡榮辱

懷方蓉臺

宗鏡

任城

雨洗碧蘿碧天容如此清病隨殘暑退詩逐嫩涼生蕭葛三年思關河萬里情南來應有雁不見尺書橫

過仁皇寺

瘦藤扶我上山行滑笏溪光潑眼明一抹寒烟人不見松風吹出木魚聲

雨窗

溼雲如絮雨如繩窗拓臨溪水氣蒸沙上老鷗閒似我屋邊枯樹瘦於僧架餘列軸貧無補竈斷炊薪價又騰坐與山妻商活計好乘新漲下魚罾

湯溪

空山桂花發子意復云何流水石橋古夕陽秋草多泉温新
試浴村靜晚聞歌幽絕黃山道平生幸此過

楊柳岸曉風殘月圖為張硯溪惠昌題

重唱尊前腸斷詞花殘月缺鬢絲絲酒闌合眼分明見猶是

兜孃最小時

四愁滋味慣能諳柔櫓咿啞最不堪霜氣壓篷風拍水扁舟

載夢過江南

高炳麟字昭作仁和諸生著我齋詩集

譚獻傳略我齋居士生有異秉讀書鏡敏識解尤異童
年即好詩古文辭討論其善否一疑未澈恆廢寢食得
之乃已詩文學韓退之詩不多作為文渾渾
入古似不欲入宋人流派然未嘗自道也

葛將軍寶刀歌

文臣使筆如使刀筆端草檄風蕭蕭武臣用刀不用筆持刀
躍馬須殺賊方今文武徒紛紛寶刀能擇眞將軍將軍得刀
刀得主成忠昭勇俱刀名輝星雲嗚呼寶刀何足道刀歸葛公
刀乃寶刀存公死刀藏鋒世無葛公刀不從

秋日寓居越州作歌八首

西風一夜萬木摧客子搖落亦可哀吳越相望隔秋水舉目
但見飛雁迴會稽鬱鬱東南鎮禹穴蕭森幾人間敢道吾生
松柏材且隨蒲柳同盛衰

臥龍山頭越王殿越王去後荆榛徧卻看太守坐官衙五馬
朱輪有人羨樵風涇與賀監湖昔時隱者眞吾徒種蠶功名
亦蕭索誰歟共結深山廬

吾家舊隱西湖濱高臥不計秋與春新涼水閣自憑眺豈識

遠道多風塵，祇今襪被嗟。爲容萬壑千巖冷，行迹兩地雲山。
一斷蓬天涯，看盡丹楓色。

若邪谿畔，芰荷老獨放。扁舟入紅蓼，玉顏何處浣。紗人祇恐
西施竟枯槁，東鄰呼我爲謫仙。貰酒飲我俱陶然，夕陽歸鳥
倦投樹，我行不返，毋乃顛。

江流八月飛銀潮，魚龍怒戰秋風驕。吾鄉此景本奇絕，不數
天塹長江遙。金焦千里兵氣惡，猶幸龕赭未聞角。遠道征人
待寄衣，砧聲卻亂秋城柝。

聞道蕭條白門柳，繫馬紛紛來小醜。六朝金粉總成塵，忍對
江山一回首。陳陶流血千里殷，可堪落葉隨流瀉。江都繁華
亦已歇，洗兵何日杼時艱。

雕鶚盤兮越山崇，下有飲澗垂天虹。感時志士涕盈袖，報

國願學張巡忠

皇威赫濯終揚烈海甸妖氛有時絕書劍從軍未敢言獨倚
桐陰對新月

嗚呼世事滄桑不須問書生祇合安時命昨夜繁霜滿樹林
年華那惜人雙鬢蘭亭陳迹昔已過今此不樂將如何蟲聲
淒切弔羈客我欲歸去歌繁阿

詠雪用煎茶韻

密密疏疏小閣前爲他世界洗暄闌梅原冷澹妝逾潔松未
彫殘節自堅一種熱腸消酒醉十分清味付茶煎書生未待
金門漏凍硯頻呵只欲眠

頻年身世託悲歌合讓飛雲鬪巧多人事炎涼休問訊天心
冷暖且經過凍殘竹葉腰難折嚼共梅花手可搓珍重歲寒

無限意尖又豈獨和東坡

秋雨一首錄似杲軒上人

一霎雲容斂素綃長空潑墨雨聲驕卽看簷溜疑飛瀑直恐
山谿欲起潮涼意釀添幽徑竹秋懷愁絕小庭蕉洗妝笑對
遙峯黛汲取新泉細與描

江

藍字蘭圃仁和諸生
著二休山人詩草

陳烈女詩

并序

烈女名和貞錢唐陳寶功女禮部侍郎嵩慶姪孫女
辛酉冬杭城陷賊至其家女仰藥死父母亦遇害

縱使身留可活親親心何忍辱兒身紅閨大節先親盡不作
親前狼籍人

魏錫曾

字鶴廬號稼孫仁和人官福建
浦南場大使著積語堂詩存

趙之謙傳畧君性孝友幼聰穎篤嗜金石之學辨證考訂至老不倦暇官後仍以著作自娛嘗病金石萃編疏漏百出因撰萃編刊誤若干卷又撰續語堂碑錄以補其遺在漳州爲沈問堂太守修府志體例極精又以侯官李氏所刻翁覃溪復初集外銷最多假丁氏所藏蘇齋手稿校讐改正并輯佚詩二十四卷佚文數卷其他著述有唐開成石經圖考續語堂題跋若干卷尤嗜印章同人所收藏借揭無虛日善別真贋丁氏百石齋浙藏浙西六家印數百方皆經君審定者

論印詩二十四首 并序

余夙有印癖里居之日嘗與毛西堂何夙明朱芑孫諤卿諸君手拓丁黃蔣奚二陳之作哀然成譜其他名家手製別爲一集比歲遊蘇常閒搜訪如前聞見浸廣遭亂以來不復措意於此者一年矣邇從德園朱丈借書承以賴古堂殘譜見示雖闕軼過半自何雪漁以下尙得六七十人其中朱修能江觴臣黃濟

叔丁原躬諸家皆向所未見者愁病之中獲此巨觀

就生平涉獵所及作論印詩二十四首其名雖盛而

未及寓目與雖寓目而無所可否於吾心者從略焉

贗鼎遍天下俗至不可醫箋尾雙朱文秀華擢金支安得窺

全豹撥霧南山陲文彭三橋

得力漢官印親炙文國博一劍抉雲開萬弩壓潮落中林摧

陷才身當畫麟閣何震主臣

仇血濺丹砂壯哉博士句如何干將鋒劃石少奇趣軒蘇而

輕何阿好不足據蘇宣爾宣爾宣少喜任俠仇人血濺丹砂紅李博士應徵贈句也蘇有專譜序中

謂與主臣同師國博而爾宣獨得其秘

凡夫荆草篆頗害斯籀法修能入印刻不使主臣壓朱文啟

鈍丁行刀細如掐朱簡修能修能為趙凡夫製印甚多其篆法起訖處時作牽絲頗與凡夫草篆相

類何夙明嘗述尊甫夢華先生語云鈍了印學從修能出今以朱文刀法驗之良然

明詩半七子明印皆主臣千秋稱具體眾中最嶙峋諾責於

櫟園周內傳去聲印人梁表千秋周櫟園印人傳於千秋多微詞蓋求其作印不得遂詆之爾

山農鑿花蕊璠璣黯無色笑把昆吾刀驚脂受鐫刻雕人備

冬官對之慚溺職江編

妥帖未排稟傾倒櫟下翁後生揚其波巨譜成飛鴻江南平

遠山未足攀華嵩黃經濟叔濟叔多平穩之作似為飛鴻堂一派所祖

晦翁和淵明薛氏易定武元長摹雪漁同此用心苦自運希

錚錚多錢必善賈程樸

茂古陋相斯探索倉沮文文何變色起北宗張一軍雲雷鬱

天半彝鼎光氤氳程遠穆備文何南宗穆備北宗黃小松印款中語

嶧山瘦硬意棗木肥不傳原躬自得師奏刀法秦權淩波洛

水神吹氣藐姑仙

丁元公原躬

身依元都觀口誦黃庭經登壇習禹步裁冠戴華星金丹不

換骨何由跨雲駟

丁良弼秋平

咄咄尙左生琢印如琢硯石質具峻剝字形隨轉變亂頭麤

服中姬姜終婉孌

高鳳翰西園

凡民與翦林學書驂靳如我觀凡民印古勝凡民書翦林亦

能印銀章篆蟲魚

沈鳳凡民十通中有印

余舊藏翦林致凡民手札數拓一紙作大篆下綴小字云

銀章若此何如

蒙泉數印人高汪鈍丁亞瀟灑梅花幘芝泥漬林罅汪似勝

于高結構差入化

高翔西唐汪士慎近人

洗妍媚之習語

見奚蒙泉印跋

健遜何長卿古勝吾子行寸鐵三千年秦漢兼元明請觀論

印詩渾渾集大成丁敬

朱文六國幣白文兩漢碑沈浸金石中古采揚新姿姿媚亦

何病不見倩盼詩黃易

山人學佛人具有過師智印法硯林翁渾噩變奇恣辦香擬

杜韓三昧匪遊戲蔣仁山堂硯林丁居士印猶浣花詩昌

何未足比擬又辦香硯林翁者不之誰得其神得其髓

冬花有殊致鶴渚無喧流蕭澹任天真靜與心手謀鄭虔擅

三絕篆刻餘技優奚岡

草法入篆法下筆風雷掣一縱而一橫十盪更十決笑彼薑

芽手旋蟲效蠶齧陳鴻壽

秋堂師硯叟自謂得工整媸媸復纖纖未許康莊騁小印極

精能芥子須彌境陳象鍾

秋堂

研窮汶長書小學署元士編排漢印字分韻見條理華實備

春秋操觚異率爾

桂馥未谷士印所著漢印分韻極精審未谷有小學元

媛叟愛完白遺譜慨星散纍纍押尾章朱光接炎漢鐫詩贈

兩峯瓊瑤鬪璀璨

鄧炎石如任問渠家見其四體書冊入分之妙殆罕

倫比冊中鈴印二三十方亦無不佳少時刻印摹兩京最愛

完白鋒勁橫同時惟有陳曼生後來始知丁龍泓何子貞太

史題龍泓詩幅句也張叔未叟舊以印譜見貽中有鄧作亂

插繁枝向晴昊一紙其邊款云兩峯子某瓊瑤璀璨古浣子

摹篆剛健婀娜變化學秦印失則為披猖長庚獨精整婉孌而安詳時擬荆

山璽或仿蘭沓當

胡唐長庚

始學求是齋材力實遠勝繼法種榆僊橫厲闢門徑安得三

萬卷潤彼四千乘

趙之琛次閣

吳元禧

原名承保字葆珊海甯歲貢官象山訓導

許淮祥曰：葆珊先生少有文名，懷才未遇，遂壹意岐黃。之學爲人治疾，洞中覈要，戚邨中奉之如和緩，著有景岳全書。注若干卷，家貧無力鏤版，辛酉之變，避居長安村落，死於難，藁本燬後，嗣亦零落，尤可慨已。

輓湯貞愍公

城社瀕危日，英雄墮淚秋。忠忱三世埒，義氣一門收。念此捐軀烈，嗟他食肉謀。臣心如水潔，蹇蹇信无尤。

陸以鎔

字協之，號耕廬，海甯貢生，官戶部主事。

吳慶坻曰：耦廬師少負文譽，兼通醫理。沈浮郎署十餘年，卒於京邸。

題樵李黃鹿萃蒲團獨坐小影

古今自去來，誰與離塵垢。惟君標清品，越望夙推右。樵李擇處仁，芳蹤誰比耦。奇書及醇醪，不離手與口。有時命鐵筆，奇字摹斯籀。愛菊似陶令，談碁伴橘叟。爰有長康流，妙筆今無偶。貌君結趺跏，命意良有取。逃禪得清淨，入墨慎勿詬。

蔣學濟

字允仲號天匏光煦子海甯諸生

秋晚泛舟橫港

扁舟浮一葉雙槳盪平流
楓樹忽紅葉蘆花還白頭
行蹤偏

耐冷詩味澹於秋聞說多名勝豪情逐浪游

年時曾避地今日復重游
村小亦成市橋低不礙舟
良宵明

月好杯酒故人留聊得歡同飲
清歌爲我謳

李善蘭

字壬叔號秋紉海甯諸生官戶部郎中

徵入府志同治七年廣東巡撫郭嵩燾薦善蘭通算學

同文館充算學總教習總理衙門章京積官戶部郎中

晉三品卿銜善蘭少受業於長洲陳奐治訓詁兼涉詞

章於算學好之獨深年十歲見九章以爲淺近不足學

得測園海鏡學之遂通中西之術咸豐開游上海與艾

約瑟及偉烈亞力譯幾何原本後九卷代數學代微積

拾級重學曲綫說談天諸書信筆直書了無疑義幾何

原本第七卷至十卷中外皆失其傳第十卷尤闕理幽

元非深思力索不能驟解代數變天元四元別爲新法

微分積分二術又借徑於代數實中土未有之奇說善

扁舟飽看山

周元會

字際斯石門人
著雪崖詩集

舟行

露冷風淒月在舟
蘆花倒影入溪流
無端孤雁衝沙起
蕭瑟林塘一片秋

張金澗

字茗泉平湖貢生官湖北
京山知縣箸入山小草

擬孟襄陽夏日南亭懷辛大

夕陽忽在山少焉
月初起鮮露滴荷珠
香氣溢芳沚倚竹招
涼風清泉湧石髓
古調久不彈知音遠
流水對此渺予懷
寤寐念之子

曉起

曙色赴簾櫳殘燈焰
尙紅鳥聲千樹碎
竹影一窗籠境靜情

逾淡心閒夢自空深山忘歲月那更問窮通

朱善鳳

字子清號芝清平湖貢生信象山教諭

送楚卿弟赴袁浦

骨肉忽分手迢迢作遠行無多今日淚不朽百年名風雨人孤棹關河夜幾更風波應自惜好慰倚閭情

朱鼎鎬

號蕉軒平湖貢生著蘆浦竹枝詞

白嶽庵詩話明經與顧訪溪徵士友善時同避亂舟山鬱塞無聊發為歌咏所作小樂府十章茲錄其二餘如春風思馬帳夜雨泣牛衣薄俗看鴉門高原半推羅雲開初浴日潮漲欲平礁皆精卓可傳

催團練

大營退紮丹徒縣軍符日日催團練窮搜羅廣聚斂招得江湖無賴客一朝還需錢五百括盡脂膏供魚肉素不知兵焉善戰鬻妻孥賣田宅此是官家治平策

駛巡船

駛巡船旗高懸都統命爾輯盜賊窮鄉店舍皆輸捐青錢十萬支一月東家就食西家宿夜向墳前盜松柏盜松柏賊已獲

朱善寶

字子玉號楚卿平湖人官江南江甯府同知殉難

江南忠義錄善寶署江甯督糧同知時金陵未復江甯官吏皆僑寓常州句容溧水先後陷步軍棄城南走善寶嘆曰毘陵不守則蘇浙瓦解我雖無守土責義當與城存亡遂勸眾登陴城陷身被十餘創死之幕客徐小庭家丁王福馮昇殉焉

絕命詞

羣公撒手棄金湯我強登陴暗自傷力竭豈堪酬

聖主魂歸何忍見高堂狂風已斷悲笳曲落日空揮寶劍光

惟有丹心終不改猶能殺賊死戎行

夏斗寅

原名人杰字伊庵桐鄉廩生著玉山草堂詩文鈔

題陸秀夫先生鐵如意

鑄錯聚成九州鐵陸公錚錚秉大節手持如意擊唾壺吐盡
平生滿腔血憶昔平章屢喪師江山半壁痛難支遂令元兵
深入境招降納款無休時誰從間道求二王惟公日夜走倉
皇益王驚殂衛王立從此長浮大海航是時公爲左丞相朝
籌軍旅暮籌餉指天誓日復中原不如意處神猶王海嶠俄
驚隕大星巨聲碾磕如雷霆厓山旋見遭殘破一舟難保小
朝廷太上由來貴不辱肯負趙家一塊肉君死社稷臣死君
浩浩洪流了殘局茲事倏經五百年其人已往物則傳得此
如意爲世守重之不異珍珠船吁嗟乎滄桑變易等閒過皎
皎孤忠獨不磨精誠猶存一片鐵爲公一日三摩挲

丁彥臣

字筱農歸安人官山東督糧道箸脈望館詩存

蓮花莊

斜月照山城柳暗池塘路翠禽掠水飛短艇穿花去何處
歌聲人在花深處

雨後發皖江

放棹大江東詩人倚短篷野煙浮岸白秋葉帶潮紅
覓句當新霽懸帆趁好風今宵泊何處定在月明中

卞乃詭

號小雅歸安諸生官江蘇婁縣知縣著劫餘吟稿

雷保廉曰公在婁日多惠政咸豐十年五月十三日
寇至先是青浦不守公即率勇五百人守西郊大橋賊
磨集師遂潰退入谷陽門令門者撻門度不能守台焚
火藥局曰無使賊有公至署服朝服坐堂上遂遇害時
年四十二

樵父詞

松風吹短衣上山雲繞足無人礪花落四山畫一綠五里望
城市十里出崑谷持我擔頭柴易彼廩中粟鑱影夕陽斜誰
聽隔溪曲

牧童詞

驅牛上平岡山深春草長三月草色綠九月草色黃無腔弄
短笛茂樹坐陰涼斜陽上圓笠滿地松花香人心與黃犢游
息都相忘

吳光鎬

字伯霆慶堃長子長興附貢
官練縣訓導著雙桂樓詩草

螢

雲斂秋空月渡河風簾香遞碧池荷畫屏燭施人無睡忪煞
紅闈小扇羅

六代繁華付劫灰隋隄無復舊樓臺芳痕化盡紅心草卻照

寒齋夜讀來

吳光鏜 字鞠甫光鏜弟長興諸生

不寐

一點寒燈照獨眠百憂難度夜如年江南初報狼煙掃翻恨

還鄉夢未圓 時在癸亥冬仲客洞庭西山乍聞官軍收復蘇州

小園

小園疎萼兩三枝獨占春先光景奇雪裏暗香風過處水邊

清影月斜時茅檐也點闌人額草閣應催處士詩慚愧年來

消滅劇不堪桃李鬥芳姿

吳光鈺 字治功號寶廡光鏜弟長興諸生箸留餘書屋詩草

若溪竹枝詞

西去清溪一櫂斜五峰山下是儂家綠蕪處處生芳草若下

原來似若耶

青山環繞畫溪邊
入望煙波斷復連
夾岸朱藤三月暮
衣香花影自年年

竹籬茅舍野人家
幾曲鷗波盡釣槎
認得錢莊還樣權
先邀

漁父問梅花
梅花莊在長安門外
唐詩人錢起故居

紅闌干外水淙淙
花撲溪煙泊畫艘
甫里橋邊春漲闊
浴波

門鴨總成雙
甫里橋天
隨子隱處

王景曾
字景沂號伴石
慈谿貢生
候選訓導著瓶室詩鈔

喜海鹽黃韻珊
變清
錢唐蔣藹卿
坦
過訪下榻草堂明

日同遊慈湖飯普濟禪院

微陽霽朝旭鳥雀喧
庭柯窮巷積雨雪
朔風厲關河胡期長
者轍聯翩遠相過
歡言伸契闊存我情
苦多勿辭村醪濁園

蔬雜以羅庭前有梅樹笑索朱顏酖命酒坐花下一酌散百
疴伊余昔種樹生意將婆娑誰能信孤潔安辭老巖阿以茲
感吾子幽賞其如何

紅爐沃雪水手索苦茗煎霏霏飫玉屑如聆清話言清言坐
忘夕月色凝霜天當窗拂塵榻窗紙冰花圓晨起好風日且
放慈湖船湖山睡新足明鏡開孱顏臨流泝禪闔梵宇波心
懸山僧頗好客飯我伊蒲筵松風醒塵夢景往情亦遷歸來
更取醉同臥梅花閒

晚渡姚江

煙雨晚濛濛滄江月在空亂流爭野渡孤棹倚秋風漁火淨
深碧汀花墮淺紅扁舟何處宿鄉夢起征鴻

舟次丈亭

風急萬山暝孤帆下
文亭潮聲兩岸月
漁火半江星
鄉樹籠愁住
滄江浴夢醒
荒村寒夜拆
倦客不堪聽

客中秋思

破帽殘衫作壯遊
海天吟望獨登樓
孤燈夜聽千山雨
雙鬢朝辭一葉秋
未臥滄江驚歲晚
欲迴鴻雁亂鄉愁
遙知松菊都無恙
權得舫船可自由

魏

鐘慈谿人著宜雨齋詩草

過覺林寺

老衲殷勤自煮茶
偷閒半日在僧家
夕陽歸去頻回首
門外一池紅藕花

謁長白山人魏冢墓

公子因國爲諸生
甲申以後變姓名
公名壁朱家灰死尙吹火

火燭茗上還弄兵兵摧復向江湖走其時閩海猶屯守閒關
引得南軍來乘風三日抵京口延平爾亦稱奇計鼓行航海
窺腹地長江天險爲羹沸驕帥一蹶出天意苦留遮道屯焦
湖大廈不支難再圖蠟丸書落小校手邏者得之公就拘武
林市上刀如雪雒邑殷遺心似鐵成仁就義慨以慷千人萬
人爭雨泣可憐白骨誰能收浙東義士吾同儔李達楊遷坐
遣戍錢唐孫治來購求初葬南屏後靈隱忠骸要與岳于近
春來春去湖水流可以搥胸訴孤憤君不見行朝兵部張侍
郎南屏山下抔土黃又不見孤山之麓有蓬顆知是同時楊
職方石人峰下改葬公口碑嘖嘖稱三忠二百年來懷古士
斗酒時酌斜陽紅我昔西冷五泛槁蘇隄白隄風蕭蕭古墓
荒涼尋不得歎息忠魂何處招今茲又作臨安客細剔山中

碑三尺苔花繡綠土花斑模胡猶辨字長白長白墓上草萋
萋空山無人聞鳥嘯我來再拜獨嗚咽兩行熱淚霑春衣

吳熾昌 字醒鄉奉化貢生

辛壬紀事

居然毒焰可薰天不帝誰為魯仲連海角聞風先納粟山頭

指日亦輸錢兩曹割地收甯界賊日曹廣泰同第某割甯海入莊地以附奉邑一顧

傾城陷象川象匪顧定欽通賊陷城見說守臣疏堵禦時危遁跡竟歸

田

與子同仇事甲兵傳聞義士助先聲自立生諸暨東安村人自稱會稽東南鄉義士

頭銜顯別旌旗煥眼界生新壁壘精是否夢魘占獵渭邑人

于邨者以包擬子牙可能置兔作干城麟圖

御詠今猶昔戊午秋今猶漢代丹御製感懷詩有麟閣於日月重光

頌

大清

孫道乾

字瘦梅號葆園晚號梅交步康季子會稽人直隸候補知府著貽研山房詩集

孫德祖曰先叔父幼善讀工詞賦喜攷訂精醫理生而
生母病孳先君及王太夫人撫之有恩方需次直隸時
聞先君疾歸侍不復出家居襄本郡善後局事敘勞加
道銜先是嘗與郡人杜公寶齋册立越郡采訪節孝局
訂成闡幽甲乙錄梓行之所著有梅花畫人傳
續刀劍錄九曲漚舫隨筆貽研山房詩文集

越王臺

越王之臺可以屈指數惟有蕭山為近古郡人偏知登臥龍
挈榼提壺過端午紅簇榴花綠蠹荷何如放櫂浮湘湖湖光
千頃浸凸碧高望城山想霸圖登臨足下晴雲涌馬門夾翠
雙峰聳遙看濤白雪山來先以伍胥後文種沼吳為問幾多
時臺敷吳王志可知宮女如花滿春殿藏嬌應恨失西施煙

波一舸知幾早但鑄黃金心事了漫說蘇臺麋鹿游越王臺
亦空嘯鳥

六陵

冬青樹老花如雪趙家舊事淒涼絕江上驚飛白雁來山中
亦走紅羊劫珠襦玉匣總成塵朽木燈檠先換骨蛻龍枝挂
水銀乾巨顱酒注駝酥黑如聞山鬼歎秋風至今杜宇嘯鮮
血別有傷心訴斷雲二十四堆芳草歇勸君莫問玉鉤斜最
願湖濱冷秋月

周錫桐

字初白山陰人清苑籍官雲南甯洱知縣殉難卹贈如例著有醫竹軒詩集

三江應宿牖

海天吹落雲冥冥三江城下孤檣停百丈長虹跨水臥動搖
勢欲吞滄溟此牖建自明萬厯驅使頗疑煩五丁怪石鑿厓

虎豹伏飛濤挾雨蛟龍腥鑑湖萬頃賴宣洩無憂禾黍同飄
萍八月秋潮捲天地往往白馬馳神靈排陳欲入不得入雪
山怒激雷霆鳴予家十里隔蒼嶺夜淡鼙鼓聲慣聽馮夷出
游水仙舞到此應亦回雲駢朝來正值微雨過帆檣明滅揚
湖舲湖流迂緩潮信退俯仰魚鳥殊忘形叢祠老木蔽白日
落蘚未蝕存碑銘能使吾越免爲沼偉哉湯公眞水星春秋
報祀今未絕荒邨俎豆年年馨獨怪詞人訪勝蹟流觴曲水
歌蘭亭此地幽遐罕過客惟餘津吏司啟扃我來懷古久延
跂波心素月涵瓏璫長嘯乘查更何往蓬萊縹緲空煙青

柳姑祠

楊柳風三月芙蓉月一川紅蠶催社鼓青雀送湖船雲雨空
巫峽煙波近水仙娥江蘊藻綠俎豆自年年

渡錢塘江懷古

羅剎猶名岸錢塘昔駐兵江山餘霸氣吳越共潮聲短劍三年客孤帆十里程西陵煙樹外殘雪萬峰明

遊子悲

在家憂飢寒出門畏道路道路有風波飢寒無粟布吁嗟乎夫耕妻織粟布猶可得江湖風波無日息

朝看千峰青暮看千峰紫千峰朝暮殊遊子愁無已春風習習吹孤檣倚篷四顧心蒼茫雲山雖好非故鄉萬里客路青天長

蘭城秋興

龍門波浪隔悠悠老大飄零古益州天外一身聊可寄尊前萬事不須愁紅菱白藕饒鄉味楚水吳山瘴遠游王粲賦才

今已退尙憐風雨獨登樓

黃綬青雲豈足誇銀河未許泛星查半年客館題蕉葉七月
僧廊見菊花閒笑神仙猶有劫愁如天地本無涯閉門近學
安心法一卷離騷過歲華

一紙音書斷塞鴻十年兄弟各飄蓬才如鳩拙天何忌官到
蠻荒命始窮廢院薜蘿喧暮雨校場旗鼓動秋風避愁擬出
乾坤外長得茫茫眼界空

宦海升沈未可知一官閒負

聖明時家從曉寢歸何益酒對秋山醉不辭翠篠烟凝荒圃
冷紅蓮露隊野塘遲苦吟無限江湖興賸與蠻臺補柳枝

望家書不至

誰遣西夷國連檣向越州蛟龍諸島險猿鶴一軍愁勢已成

強敵功難恃上游干戈家萬里早望戰雲收

招寶山無色愁聞罷貢金角聲喧蜃市兵氣壓雞林砥柱才

空詡機槍影不沈平戎誰獻策諸將受

恩深

故國風濤險荒涼逼艸廬避兵應有地傳箭苦無書薄宦山

河外浮生瘴癘餘最憐諸弟弱飄泊近何如

倪師旦

字元卿會稽人江蘇候補知縣著幻詩略

凌伯炎序略君少任俠家以中落喜篆刻之學兼擅小

篆入分比客蘇州江甯益購求漢魏碑刻羣籍考訂金

石者必展轉乞假鈎稽手錄以揚州阮氏所藏彝器猶可推拓附舟往求獨熱鼻衄遂以不起

別陳雄

聞名經十載邂逅識元龍湖海平生氣煙雲渲染工交情樽

酒外別恨夢魂中紅豆孤鐙夜相思兩地同

春夜泊舟晟舍有感

荒城如斗大三月少芳華落日留殘堞停橈聽暮笳籬根狺
瘦犬樹頂鬪飢鴉太息楓根客青燐夜火斜

吳門留別

命宮磨蝎辰安在藥店飛龍瘦不如一任浮雲歸碧落尙留
明月照蓬廬閒鷗汎汎常爲客征雁勞勞遠寄書彈鋏朱門
甯素志秋風鄉思在蒹蘆

過杭州

西湖嵐翠望中收一度滄桑感舊遊應有祖生能擊楫不逢
劉表漫登樓春風芳草歸時路淒月寒蟲此夜愁遙問孤山
林處士梅邊清福幾生修

燈

月斜添客思，獨坐益淒清。顧我依依影，憐君夜夜情。空花徒爛漫，寂照更分明。不忍成輕別，還聽曉漏聲。

任作梅

字蒼夫，會稽人。著拙政齋彙二卷。

章琢其曰：蒼夫，行誼雅潔，不求仕進，所居在豐山濠水間，園林幽僻，菜室藏書，時與朋舊賦詩遣興。雅志可羨，緝雅堂詩話。蒼夫五言頗具奇思，如有琴吾不獨無酒，彼仍昏見月招山鬼看花眷水仙，似非古人齒牙語。

草堂初成

瘦怯西風料峭寒，閒攤詩卷下簾看。茅檐已拓三弓闕，蔬圃猶存半畝寬。退士門庭塵不到，稻花村舍夢俱安。喜逢昨夜瀟瀟雨，新種牆隅竹幾竿。

周鼎臣

字俊卿，蕭山諸生。

閩中送友人回里

荔支香裏雨霏霏，聽到驪歌淚滿衣。異地與君同作客，不堪

客裏送君歸

雨夜聞笛

涼風吹浙瀝夏夜覺秋生正憶家千里俄來笛一聲燈搖孤館影愁逼旅人情禁得淒淒雨幽階滴到明

周白山

字雙庚號四雪餘姚諸生

家傳略君少食貧力學嗜古愛奇五七言宗法唐賢上
拆漢魏散體文學髯蘇尤喜漆園吏吃公及太史公
書困厄久之道光戊申始受知趙文恪補博士弟子員
已西郡守漢軍徐榮公課鼓山書院士得君卷詫為奇
才招之郡齋讀書咸豐壬子萬文敏歲試尤奇賞君經
藝精鑿奇峭謂似周秦諸子首拔之始食槃滌樓宗先
生掌教鼓山又亟稱之與同郡趙之謙攜未有周趙之
目然六踏省門輒報罷辛酉之難遂挹鬱窮餓以死年
未五十也詩文散佚有海濱課餘草猶少作又嘗與趙
合刻所為文曰諱各數十篇髮後並失天生異材既
戴于遇復促其年并其嘔心搨血之作
亦不使留傳天壤矣州九命匪所詳矣
孫德祖曰余非角時及見所謂諱者制藝也長篇僅千
言不止少或不及百字僮幼未之測焉然一時禮法之

士豈不按劍以趙徐諸公激賞之且有腹誹諸公者若宗先生則余嘗著門籍深知先生以愛才之甚有取于狂者而欲進之于中庸之域也雙庚既困阮以死今所得止此錄之足使秋墳哀唱聊抒孤憤抑亦將以論將來胥知緼幽鑿險蠶叢難關通眉長爪仙才近鬼賦閒氣者慎勿投入天荆地棘自促其生可已

長歌贈平三棟山

韓侯支子食平采歷數千年生平三平三境平才不平平地直駕行空驂髻年努力習制舉敗絮拋擲杭州柑滿堂麤戰慣逐北一老升坐猶和南飛揚跳盪盛意氣讀書忘卻午與未馬香屈豔口角霏陸海潘江筆頭沸自言習尙不足爲嚼破黃蠟殊無味願得牙爪雲水龍底須羽翼蘭苕翡海濱狂生號四雪兩沈苦海心如鐵棟山把臂繆擊節如意亂打唾壺缺言嘔余心摑余血架上爛本余何屑海水雖苦尾閭洩終薄扶搖九萬折聞君忠告轉嗚咽感愧交并肺腸熱同聲

莫解相思結，忼慨復與從。頭說臥龍山，顛望海亭。風雨不動，龍氣鯁與君健步。拾級上，頰視下界如浮萍。棟山棟山當妙齡子衿，胡亦歌青青城闕。佻達古所戒，磨光刮垢升。

紫庭

天子神聖初御極

詔開恩榜求明經，相期特達佐

元化不才休作三台星

校鐵孫先生銅瓦集成題後

十年客癯珠江水，二月驚濤銅瓦門。碧海揚帆摩舊壘，青山澆酒哭忠魂。衝雲籃筍邊城曉，照眼梅花古驛昏。不爲蒼生籌善策，哀絲豪竹其誰論。

校罷瑯嬛漏五更，燈前一片戰場聲。感時獨賦秦州句，捩要

疇荒信國營沙草可憐前度色錢江何幸近來清不才許侍
蓬萊閣載讀長歌慷慨生

常潤道中

瞥眼雙隄曳纜過奔騰一氣走鼃鼃江嵌鐵雙城形小日盪
金山塔影多獨鶴無風盤大澤亂帆如雪湧晴波蓬窗忽作
還鄉夢斗酒娛親老醞醅

魏蘭汀

字夢香 嶼廩生 著夢香草四卷

縣志蘭汀善讀工詩年十五成諸生屢試高等二十九而卒越有詩集蘭汀與焉

任湘傳畧夢香穎悟過人與弟渠成字水香馳騁名場
丁巳六月水香病卒夢香為文祭之血淚迸下後一年
亦卒余往慰璜溪翁徘徊夢香讀書處几席橫
書題痕在壁夕陽西墮悲風吹衣泣然久之

齋居書懷

焚香息眾慮斗室如深山夕陽射窗紙好鳥鳴閒關靜觀若

有會得意翻無言清風颭然至爽氣生眉閒始悟達人趣心
靜境自閒太虛何寥廓浮雲空往還

懷俞秋舫

一雨入初夏眾綠環階除好鳥林端鳴翩翩引雙雛眷念同
心人相見日以疏野花開復落心賞誰與俱翹首望天末清
風吹衣裾

廢園行

煙雨迷離三月節落花滿地紛如雪我來憑弔一淒然曲檻
迴廊半傾折當年行樂擅豪情寶馬香車縱復橫紅杏簾櫳
朝放燕綠楊樓閣暮聞鶯鶯燕燕娛清晝花天月地春如
繡試舞當筵置翠盤徵歌按節拋紅豆歌舞酣嬉年復年郎
郎一夢化雲煙蒼苔破瓦棲鼯鼠蔓草荒亭哭杜鵑繁華畢

竟歸何處太息浮生等朝露冷落朱門車馬稀夕陽慘淡橫
枯樹君不見石馬銅駝臥草萊玉津金谷化塵埃古今興廢
皆如此宇宙茫茫半劫灰

秋日山行

濛濛青不斷嵐氣襲人衣一壑白雲冷滿山黃葉飛露花涼
有韻林鳥淡忘機獨立發長嘯鐘聲出翠微

李肇桂 字香山又號覺道人臨海人著夢覺草堂詩藁

望江樓晚眺

雲散水悠悠潮平一葉舟斜陽千嶂夕紅樹半江秋波影虛
涵碧山光冷入樓登臨身世感鳴雁下汀洲

田家雜興

一生無所求雖貧亦自貴幽居近竹林庭前發奇卉散步啟

柴扉偶值鄰翁至班荆無別言共話田園事回頭落日斜暮
鐘鳴野寺

宿西臯村

夜行青山閒月華白勝雪寒鳥數移柯風拗枯枝折遙看楓
林中一燈自明滅徐步穿羊腸投宿上嚮窠老翁倚柴扉鷄
衣百其結邀我坐土階臨風長太息問翁何所思欲語先嗚
咽日食不能飽被裂冷于鐵大兒事征戍戰伐無休息小兒
復遠行不識存與歿言罷復長吁知爾心如割我聞爲慘傷
如歌古離別相對兩無言淚眼看明月

晚霽

屋上晴鳩唳簷前雨初霽斷雲橫遠峰日落柴門閉倚檻望
西山新月在松際

管名箴

字韻甫黃巖諸生著醫俗軒彙

家傳略韻甫性至孝七歲失怙事祖母蔡盛淑必躬親及及哀毀骨立教授弟子必以孝為本嘗輯孝經古注

靈石寺

欲問飛來石殘鐘出遠林空山甘露下古寺白雲深花好增
禪趣茶清洗客心玉溪不可作望古一沈吟

題黃茅山聽泉處

萬籟聲已寂尋山過短橋流泉穿石罅飛瀑挂巖腰坐久機
心化人閒夕照遙烹茶入林下黃葉落蕭蕭

朱

寫

字千人號東軒浦江歲貢著自怡軒詩文鈔

浦陽殉節錄髮逆之難篤遇賊大罵被刺全家殉難
卹贈雲騎尉世職祀彰義祠

讀左傳

六年子同生如齊隔一紀訛說徒紛紛反云非吾子昌曰展

我甥千古留詩史

孝子重守身親在何敢死嗟嗟頽考叔所爭一車耳性命等

鴻毛純孝胡至此

檜亡春秋始曹亡春秋終當其未亡時君子謀社宮二百四十年一十有二公傳聞多異事無乃皆夢中

松化石

朝發霍桐山暮宿延真觀道士馬自然庭前喟然歎云此青松根當為白石爛依稀虎可疑彷彿龍能變昔受大夫封今當丈人嘆休言石無知幻化在一旦

周世滋 字潤卿西安歲貢官永康訓導著淡永山窗詩集十一卷

西安懷舊錄潤卿性落落寡合同治閒由永康解任歸閉戶著書有玉屑編等彙未刊

撥悶

一篇孤憤注初成
蕭瑟蓬門歲月驚
文字幾人能有福
公卿自古少傳名
烘開花已精神竭
翻刻書原價值輕
長惜茂陵無遠志
肯圖軒馬足平生

人海喧闐起大波
吟餘梁父奈愁何
刑天學舞知羞少
渾沌無眉欲畫多
讀史每留千古恨
論詩不厭一分苛
疑團未破楊炎夢
顛倒花前金叵羅

偶成

滿園紅樹塢櫻桃
梁燕初來破寂寥
春帶一分陰更好
酒中連日病難消
燈前罔兩差堪問
海內文章半可燒
爲語閨人休折柳
清明時節正花朝

胡震源

字篔浦桐廬諸生殉難
贈縣主簿著貽清仙館詩集

采桑曲

大婦燈前織竹筐
小姑梳洗學時妝
茆檐挂出團圓月
相約明朝去采桑

高處柔桑共倚梯
低枝卻好與肩齊
踏青繡得紅鞋小
半染苔紋半錦泥

王汝霖

字若時景甯歲貢

縣志汝霖績學砥行雅稱儒範

荷峰遠眺

萬壑奔如飛
突見危峰起
蒼翠有無間
新荷泛中沚
林翳迷參差
星辰近尺咫
俯看川野分
勝或匡廬擬
暮鳥相與還
羣山一齊紫
懷哉髯蘇吟
九華蓄壺裏

兩浙輜軒續錄卷四十三